

# SA IYANG PRESENSIYA



Salamat, Igsoong Neville, ang Ginoo magapanalangin kanimo sa madagayaon gayud.

Ug maayong gabii, mga higala. Usa ka dakung pribilihiyo kini nga makabalik pag-usab dinhi niining bilding karong gabhiona, ug mabati ang walay-pagkapakyas nga Presensiya sa atong Ginoo, sumala sa Iyang gisaad. Ug karon, nasayod ako nga daghan kaninyo ang nagpabilin para sa hamubo nga Mensahe karong gabhiona, nga tungod niini mapasalamaton gayud ako. Ug daghan kaninyo ang mobiyahe pa og halayo karong gabhiona, aron makapauli. Ang uban kaninyo mihawa na sa inyong mga motel, sa akong nasabtan. Ug paningkamotan namo nga dili kamo pugngan og dugay, mao kana ang hinungdan nga mianhi kita og sayo aron nga makapamauli kita og sayo.

<sup>2</sup> Ug karon atong himoon, pagmahimo ko na, akong ipahibalo kung ugaling sugdan na, adunay pipila ka mga tawag kanako kaganinang hapon, nagapangutana kon kanus-a nato pagasugdan ang mahitungod sa niining mga basahon, o sa niining mga kapitulo. Ug sa hunahuna ko, kon itugot sa Ginoo, akong hisgotan, sa sunod higayon nga sugdan nato, ang mahitungod sa Pito ka Mga Selyo sa Pinadayag, ug ang pito ka natural nga mga selyo. Ug, kung mahuman dayon kita, hisgotan nato ang pito ka mga selyo sa likod sa maong Basahon, kita n'yo. Karon, magkinahanglan kini tingali'g ubay-ubay nga panahon. Kita n'yo, adunay pito ka mga selyo nga giablihan; adunay pito ka mga hampak, pito ka mga trumpeta, ang tanan nianang mga pito; ug mahimong hisgotan nato una ang mga selyo. Apan unya sa likod sa maong Basahon selyado kini og pito ka mga selyo. Nadungog ni Daniel ang mga tingog, ang mga dalugdog, ug gidid-an siya nga isulat kini. Gidid-an si Juan nga isulat kini. Apan selyado kini diha sa likod sa maong Basahon, kana mao'y, human nga hingsayran ug napadayag ang tanang mga tinago sa Basahon. Mahimatikdan ninyo nga miingon si Daniel dinha, "Ang mga tinago sa mga adlaw sa niini nga mga tingog, ang tinago sa Dios kinahanglan nga maipadayag na nianang panahona." Kita n'yo, "ang tinago," kung kinsa ang Dios, kung giunsa nga nahimo Siyang unod, ang tanan niining mga butanga kinahanglan nga igapadayag na nianang panahona. Ug dayon— andam na kita kung ingon-ana para sa Pito ka mga Selyo sa likod sa maong Basahon, nga wala pa gipadayag ngadto sa tawo, wala pa gani nahisulat sa Biblia, apan kinahanglan nga eksaktong takdo gayud sama lamang sa tanang uban pa nga bahin sa Biblia, ug sa hunahuna ko usa gayud kini ka dakung butang.

<sup>3</sup> Busa paningkamotan na nato karon nga dalion kini aron mahuman dayon. Ginapasalamaton ko ang matag usa kaninyo

tungod sa inyong kaayo ug sa inyong pagtambong, ug—ug sa tanan ninyong mga gibuhay, nagapasalamat gayud kami kaninyo. Ug karon ako—nagalaum ako nga dili kamo namo langayon og ayo karong gabhiona, tungod kay pagkamapailubon kamong naglingkod, og nagtindog. Miingon ang akong asawa nga anaa dinha sa likod, nagsulti siya bahin sa miaging gabii, miingon siya, “Nakakita ako og mga babaye nga medyo tambukon, nga nagatindog didto, ug basâ kaayo sa singot ang ilang mga sinina, pero nagatindog gihapon didto, nga ginasabot gayud og ayo ang matag Pulong.” Mao kana ang hinungdan kung ngano nga gusto kong magpabilin ilalum sa dihog sa Espiritu Santo, nga sa pagtungtong mo dinhi ang ginasulti mo lang ngadto sa mga tawo nga ania dinhi puro tinuod nga Kamatuoran, kita n’yo, ug wala na’y bisan unsa kondili ang Kamatuoran lamang. Ug makasalig sila Niana ug mamahimong maayo.

<sup>4</sup> Karon gusto kong mangayo’g pasaylo kaninyo sa pipila ka minuto. Medyo napasayo ako kaganinang buntag. Ug gipalong na nila ang mga teyp niadtong higayona, ug akong—sultihan ko unta ang mga tig-rekord nga sa makadiyut ipaandar ang teyp. Gusto ko unta humanon kadtong *Pabalik-nga-ihap*, sulod sa lima ka minutos, ayha pa ako mohawa. Nalimtan ko ug nakabiya na dayon ako kaganina, nga akong nadire-diretso kaganinang buntag hangtud nga nakabiya ako nga wala man lang nasulti og bisan unsa man bahin niadto. Mao nga, medyo wala ko kamo mapatagbaw sa, “Kung unsa ba gayud ang *Pabalik-nga-ihap*?” Kita n’yo? Nasayod ako nga ania na kita sa panahon mismo sa pabalik-nga-ihap, apan unsa ba gayud ang pabalik-nga-ihap? Kita n’yo? Kung wala kamo mahibalo kon unsa ba gayud ang pabalik-nga-ihap, nan medyo kamo maglibog niana. Ug busa gusto ko—ko na nga—nga humanon kana, gayud, ug paningkamotan nga mao ra sa gihapon ang akong tonada kaganina sa pagtapos niining teyp karon, aron maipang-apod-apod na ang kining teyp nga, *Pabalik-nga-ihap*. Karon pasayloa ko ninyong tanan sa makadiyut lang, ug gusto kong humanon na ang kadto nga teyp. Makahulat pa ba kamo sa makadiyut lang, sa dili pa kita magsugod sa laing usa? [Nagaingon ang kongregasyon “Amen.”—Ed.] Ug karon—sa mga tig-record, kung mahimo ninyo, ipindot na ninyo ang inyong teyp karon.

[Blangko nga bahin sa teyp. Ginasaysay ni Igsoong Branham dinhi sa parapo 4-5 kining igasal-ot niya nga nawala nga bahin sa iyang pangbuntag nga wali nga giulohan og *Pabalik-nga-ihap*, ingon nga parapo 106-111—Ed.]

<sup>5</sup> Bag-o lang kami nakaabot gikan sa nagkalain-laing mga lugar, ug nagkaaduna kita og maanindot nga kahigayonan sa ulahing tulo ka mga mensahe, nga naghigot mahitungod sa—sa nagkalainlaing mga doktrina ug sa uban pa nga atong gipresentar. Nahinumduman ko lang niining higayona nga maghatag diay ko og diyutay’ng espasyo dinha, kamong mga

tig-teyp, puede na ilisdan ang teyp. Sultihan ko lang kamo kon puede na tuplokon. Sige. Karon, kinahanglan kong bantayan kini. Mora og daw sa artipisyal lang kini, apan kinahanglan man gud nga ma-teyp kini sa maong mga igsoon nato. Ug dili sila puedeng masayop niini; kay kung masayop sila niini, dili kini masabtan sa mga tawong nagapaminaw dinha. Busa kinahanglan namo nga himoon kini sa niining paagi. Ug kung aduna ma'y mogawas sa inyo dinha sa sulod magsinyas kanako, Junior, kung nakaandam na nilang pulihan ang teyp. Salamat kaayo, mga igsoon, usbon ko, salamat sa tanan sa inyong pagkamaayo ug tanan na. Bueno, andam na kita karon, mahimo na ninyo nga paandaron og tuplokon ang teyp.

<sup>6</sup> Panalanginan kamo sa Ginoo. Malipayon kita nga maania na usab dinhi sa taberbakulo karong gabhiona. Napuno na usab ang maong lugar sa daghang mga tawo og nagatindog pa ang uban sa palibot karong gabhiona, sa tulo ka adlaw nga . . . o tulo ka higayon nga panerbisyo. Gusto ko nga ang si kinsa man nga nagapaminaw sa niining teyp, nga puede silang moanhi dinhi ug mokuha niadtong teyp sa miaging gabii. Tun-i ninyo kini sa inyong panimalay. Kini mao ang—ang sa karon nga yugto sa ministerio nga gikahatag sa Ginoo kanako. Gusto ko ilabina ang mga ministro nga madungog nila kana sa dili pa ako mobisita sa ilang mga iglesia ug moadto sa ilang mga panimalay. Karon gusto ko sila nga—nga makakuha sila niana. Karon, kaganinang butag naghigot kita bahin sa hilisgotanan nga *Pabalik-nga-ihap*, nga andam nang mobiya ang Iglesia.

<sup>7</sup> Ug karong gabhiona, kon itugot sa Dios, magahigot kita sa hisgotanan nga *Sa Iyang Presensiya*. Ug, oh, daw sa unsa nato ginapasalamatan ang Dios tungod sa pribilihiyo nga makaduol kita sa Iyang Presensiya. Apan, una, gusto ko nga ablihan ninyong tanan ang inyong mga Biblia uban kanako ngadto kang propeta Isaias, ang ika-6 nga kapitulo ni propeta Isaias. Nasayod kitang tanan nga si Isaias usa ka medyor nga propeta, ug usa sa mga bantugan nga propeta sa iyang adlaw. Natapos ang iyang kinabuhi niadtong giputol ang iyang lawas pinaagi og mga gabas, ingon nga testimonyo, ingon nga usa ka martir alang sa gahum sa Dios nga Makagagahum sa tanan. Sa Basahon sa Isaias, ang ika-6 nga kapitulo, sugdan ko sa ika-5 nga bersekulo, ang pagbasa. “Unya miingon ako, ‘Alaut man ako!’ Tungod kay. . .” Siguro sugdan ko na lang sa ika-1 nga bersekulo. Hatagan n’yo lang ako og diyutay’ng panahon. Sugdan nato sa ika-1 nga bersekulo ug magbasa paubos hangtud sa ika-8 nga bersekulo.

*Sa tuig sa pagkamatay ni hari Uzziyas nakita ko ang Ginoo nga nagalingkod sa usa ka trono, hataas ug tinuboy, ug ang iyang saput nakapuno sa templo.*

*Sa ibabaw kaniya diha ang mga serafines: ang tagsatagsa adunay unom ka mga pako; sa duruha*

*gitabonan ang iyang nawong, ug sa duruha gitabonan ang iyang mga tiil, ug sa duruha siya milupad.*

*Ug ang usa misinggit sa usa, ug miingon, Balaan, balaan, balaan, ang GINOONG Dios sa mga panon: ug ang tibukok nga yuta napuno sa iyang himaya.*

*Ug ang mga patukoranan sa mga pultahan nangurog sa iyang tingog nga nagasinggit, ug ang balay napuno sa aso.*

*Unya miingon ako, Alaut man ako! kay patay na ako; tungod kay ako usa ka tawo nga mahugaw og mga ngabil, ug ako nagapuyo sa taliwala sa... mga tawo nga mahugaw og mga ngabil: kay ang akong mga mata nakakita sa Hari, ang GINOO sa mga panon.*

*Unya ang usa sa mga serafin milupad nganhi kanako, nga may usa ka baga nga carbon diha sa iyang kamot, nga iyang gikuha pinaagi sa mga kumpit gikan sa halaran:*

*Ug uban niini iyang gihikap ang akong baba, ug miingon, Anaa, kini naka-tandog sa imong mga ngabil; ug ang imong pagkadautan ginakuha na, ug ang imong sala ginapasaylo.*

*Ug nadungog ko ang tingog sa Ginoo, nga nagaingon, Kinsa man ang akong ipadala, ug kinsay moadto alang kanamo? Unya miingon ako, Ania ako; paadtoa ako.*

<sup>8</sup> Hinaut nga panalanginan sa Ginoo ang Iyang Pulong. Sa hunahuna ko usa kana ka kahibulongan nga Kasulatan. Makita nato nga, sa Presensiya sa Dios, maila sa mga tawo ang ilang mga kaugalingon ingon nga mga makasasala. Mahimong bation nato og medyo matarung kita kung anaa sa ubang lugar, ug mobati nga ingon kita ka matarung nga mga tawo, apan pagmoduol kita sa Presensiya sa Dios, dinha nato makita kon unsa gayud kita ka gamay.

<sup>9</sup> Dili pa lang kaayo dugay nakauban ko ang usa—usa ko ka higala nga nahatagan ako og pribilihiyo nga makabig kang Cristo, si Bert Call, didto sa New Hampshire, nakauban ko siya sa pagpangayam, nagatindog kami kaniadto daplin sa Cold Brook Falls didto sa Adirondack, ug usa kadto ka daku kaayo nga busay. Gidala ko didto ang akong pamilya niadtong miaging tuig aron nga makita kadto. Halayo kaayo kadto gikan sa dalan, kinahanglan mong mobaktas aron nga makaabot didto. Ug sa dihang nakita na namo kadto asul-lunhaw nga tubig nga nagaagay nga may ingon-niadto ka kusog nga sulog gikan sa mga kabukiran, ug nagadahunog sa mga bato, mitindog didto si Bert ug nagtan-aw kanako, ug miingon, “Grabe, Billy, ginapabati gyud sa nianang busay ang tawo og ingon na lang ka gamay *kaayo*,” ang sukod niya nga ikaupat lang siya ka bahin sa usa ka pulgada sa iyang mga tudlo. Ug miingon ko, “Husto kana,

Bert.” Karon, didto lang niya naamgo kung unsa ang bation pag makaduol ka ngadto sa Presensiya sa Dios, makita lang ang mga binuhat sa Dios.

<sup>10</sup> Nahunahunaan ko kadtong tawo nga misulat sa *How Great Thou Art*, kung dili kaha mihangad siya usa ka gabii niadto ug milantaw ngadto sa mga bitoon, kon unsa ka layo ang mga niini! Pipila na ka bulan ang milabay, si Igsoong Fred, si Igsoong Wood ug ako, nagatindog kami niadto uban kang Igsoong Mc Anally didto sa desyerto sa Arizona, gisulayan namong, sukdon, ang usa ka bitoon, kon unsa kini ka duol ngadto sa usa pa ka bitoon. Ug sa minilyon ug binilyon ka milya ang kalay-on, mora og kung tan-awon ang mga niini dili mosobra sa ikaupat nga bahin sa usa ka pulgada gikan sa matag usa. Among naamgo dayon, sumala sa siyentipikong pagpamatuud niini, nga kadto nga mga bitoon tingali og mas layo pa gikan sa matag usa kay sa kanato gikan kanila. Makita n’yo ba kon unsa ka kahibulongan kini?

<sup>11</sup> Dinha nato maamgo kon unsa kita ka gamay sa dihang mahibaloan nato kung unsa gayud Siya kadaku, ug sa diha nga labi pang nagaduol ka sa Iyang Presensiya. Sa unsa mang paagi, kanunay kining nagahatag og dakung kadasig nganha sa mga tawo aron moduol sa Presensiya sa Dios. Nakita ko na sa pagministerio ko adunay higayon nga makita mo ang Presensiya sa Dios nga moabot sa punto nga ipaduol ang usa ka tawo ug ipadayag ang iyang kinabuhi ngadto kanila, ug ibutyag ang ilang mga sala og tanan nang matang nga mga binuhatan nga imoral, ug mohatud kini og ingon ka balaanong kahilom taliwala sa mga tawo hangtud nga biyaan nila ang linya sa pagpaampo sa dili pa sila maiampo, ug modagan ngadto sa altar aron magpasig-uli sa Dios sa dili pa sila modangop sa Iyang Presensiya. Kita n’yo, aduna gayu’y usa ka butang mahitungod sa pagduol ngadto sa Presensiya sa Dios, nagapahinungdan kini sa mga butang nga mahitabo. Kanunay akong nakakita sa mga tawong nagahigda diha sa mga higdaanan ug mga yayunganan.

<sup>12</sup> Niadtong gabhiona didto sa Mexico, sa diha nga kadtong patay’ng masuso nga gitabunan na sa habol, nga gidala sa maong makaluluoy’ng Katsilang inahan, o sa makaluluoy’ng Mexicanang inahan, diay, ang nagdala didto. Sa dihang nakita nila, nakita sa pipila ka libong mga tawo, tingali og singkwenta o setenta’y-singko ka libo sa usa ka panagtigum, nakita nga nabuhi ang maong patay na nga masuso, nangakuyapan ang mga kababayan-an, nanagpataas sa mga kamot ang mga tawo ug napasiyagit. Ngano man? Naamgo nila nga dili mahimong buhaton kadto sa kung kinsang tawo lang, ug nga anaa sila sa Presensiya sa Dios nga Makagagahum sa tanan. Ug nagpahitabo kadto sa usa ka butang.

<sup>13</sup> Nahatagan ako og pribilhiyong makadungog sa wali sa diosnon nga mga tawo. Nasugilon usa ka higayon kaniadto bahin kang Charles Finney, gamayon lang nga tawo, wala

pa'y usa ka gatus ug napulo ka libras ang gibug-aton, apan aduna siya og ingon kakusog nga paagi sa pagsulti hangtud nga... Usa ka adlaw niadto ginasulayan niya ang kakusog sa tingog sulod sa usa ka bilding. Wala pa sila kaniadto og mga P.A. system. Ug adunay usa ka tawong may ginatul-id, ibabaw didto sa balkonahe, o didto sa atop sa maong lugar, ug nadungog niadtong lalaki nga adunay misulod, og wala na niya panumbalinga pa kay wala man siya makaila, busa hilum lang siya nga mipadayon. Ug gisulayan na ni Mr. Finney kung unsa kakusog ang tingog. Human nga migahin siya og taas nga oras sa pag-ampo alang sa maong rebaybal nga iyang igapahigayon, gisulayan niya ang iyang tingog aron hibaloon kung unsa kini kakusog. Dali-dali siyang misaka paadto sa pulpito, ug miingon, "Paghinulsol, o mangalaglag kamo!" Ug gisulti niya kini sa ingon-niadto kakusog—kakusog, human nga napailalum siya kaniadto sa dihog sa Dios, hangtud nga ang kadtong tawo nga atua sa ibabaw sa balkonahe nahulog, paubos didto sa salog, o, gikan sa ibabaw sa bilding, diretso sa salog.

<sup>14</sup> Giwali niya ang Maayong Balita sa usa ka paagi hangtud nga mitindog siya didto sa Boston, Massachusetts, sa may usa ka gamay'ng bintanang lantawan, tungod kay wala'y simbahan nga mahimong mapaigoan sa iyang mga mananambong. Ug mitindog siya didto nga may ingon nga kaisog, ug giwali niya ang impiyerno nga aduna og ingon nianang lugar, hangtud nga ang mga nagatrabaho nga mga tawo nga bitbit ang ilang mga basket, nanagluhod diha sa dalan ug nanagsiyagit alang sa kalooy. Diha sa Presensiya sa Dios! Halangdon nga mga magwawali nga makahimo, pinaagi sa Pulong sa Dios, nga dalhon ang Presensiya sa Dios ngadto sa mga mananambong. Ipahilayo lang unta nga mahitabo nga gahi na ang kasingkasing sa mga tawo nga dili na gayud nila maila ang Presensiya sa Dios. Ipahilayo lang unta!

<sup>15</sup> Sa diha nga ang unang tawo, sa diha nga nakasala siya ug nakabuhat og usa ka butang nga sayup, ug sa diha nga ang Dios miduol sa iyang atubangan, o, miduol siya ngadto sa Presensiya sa Dios, "si Adan," dili siya kaniadto makatindog diha sa Presensiya sa Dios. Midagan siya ug gitago ang iyang kaugalingon diha sa sapinit ug misulay nga tabonan iyang kaugalingon pinaagi sa usa ka dahon sa higuera, tungod kay nasayod siya nga anaa siya sa Presensiya ni Jehovah, ang Magbubuhat. Mao kadto ang gibuhat sa unang tawo, human nga siya nakasala ug nga misulay sa pagduol ngadto sa Presensiya sa Dios nga may sala diha sa iyang kalag. Dili siya makatago, tungod kay bag-o pa siya kaniadto. Wala pa mikapyot ang sala kaniadto ingon nga migamot na gayud kini sa kasingkasing sa mga tawo sa karon, apan siya nahibalo gayud nga nagatindog siya atubangan sa iyang Magbubuhat. Karon, gitago niya ang iyang kaugalingon didto sa mga sapinit ug ayaw na niyang

mogawas, ug dili pud siya makagawas hangtud nga adunay giandam una ang Dios para kaniya.

<sup>16</sup> Mahimo natong balikan, ug hisgotan ang ika-17 nga kapitulo sa Genesis ug sa ika-3 nga bersekulo, sa dihang ang halangdong patriarca, nga si Abraham, niadtong miduol siya sa Presensiya sa Dios, ug ang Dios nagpakigsulti kaniya (diha sa ika-17 nga kapitulo) sa Ngalan sa Dios nga Makakagahum sa tanan, mihapa si Abraham. Ang maong halangdong patriarca, alagad sa Dios, dili siya makatindog sa Presensiya sa Dios, bisan pa og nag-alagad siya Kaniya sulod sa baynte-singko ka tuig, nga matitud-anon gayud. Apan sa diha nga miduol na ang Dios sa iyang atubangan, mihapa ang maong patriarca tungod kay dili gayud siya makatindog diha sa Presensiya sa Dios.

<sup>17</sup> Diha sa Exodo 3, makita nato dinha nga si Moises, ang halangdong alagad ug propeta sa Dios, sa dihang didto siya kaniadto sa luyong bahin sa kamingawan, usa gayud siya ka balaan nga tawo. Natawo siya tungod sa maong katuyoan. Natawo siya gikan sa tagoangkan sa iyang inahan aron mamahimong usa ka propeta. Nankingamot siya nga makaangkon og iyang edukasyon ug gibuhat ang tanang mahimo niya aron sa pagpahigawas sa iyang mga kabanay, tungod kay nasayod siya nga pagaluwason niya ang iyang mga kabanay, apan ang pagkasabut niya sa nianang butang pinaagi sa usa ka pang-teolohiya lang nga punto. Binansay siya. Nahimo siyang batid nga eskolar. Mahimo niyang itudlo ang kaalam sa mga Egiptohanon, nga mao ang pinaka-maantigo nga mga tawo sa kalibutan. Nahibalo siya sa tanang mga kakutihan niini. Kabisado niya ang Kasulatan gikan sa A ngadto sa Z. Nahibaloan niya ang mga saad nga gihimo sa Dios. Nahibaloan niya ang mga niini pinaagi sa usa ka pang-intelektuwal lang nga panghunahuna. Ug usa siya—usa siya kaniadto ka bantugan nga militar. Apan usa niana ka adlaw sa luyong bahin sa kamingawan, sa dihang miduol siya sa Presensiya sa Dios, gihubo niya ang iyang mga sandalias ug mihapa—miluhod, tungod kay nahibaloan niya nga anaa siya sa yuta nga balaan. Dili niya maitindog ang iyang mga tiil sa dihang miduol siya sa Presensiya sa Dios, mihapa siya sama sa gibuhat ni Abraham. Dili gayud siya makatindog sa Presensiya sa Dios.

<sup>18</sup> Diha sa Exodo 19:19, sa dihang ang pinili nga mga katawhan sa Dios sukad pa sa mga adlaw ni Abraham, gikan kang Abraham miabot si Isaac, kang Isaac miabot si Jacob, gikan kang Jacob miabot ang mga patriarca, ug sulod sa daghang mga katugan miabot ang balaan nga mga tawo, bantugan nga mga tawo, pinili nga katawhan, pinili nga kaliwatan, gibalaan, balaan nga katawhan, ug nanag-alagad sa Dios sa ilang tibuk kinabuhi. Ug usa ka adlaw miingon ang Dios, “Tiguma ang Israel gikan dinhi, magpakigsulti Ako ngadto kanila.”

<sup>19</sup> Apan sa diha nga mikanaug ang Dios sa ibabaw sa Bukid sa Sinai, ug nagsilaob ang tibuok nga bukid, ug nagautbo ang aso gikan niini ingon sa usa ka hudno, ug midahunog ang Tingog sa Dios. Nanaghapa ang tibuok Israel ug miingon, “Pasultiha na lang si Moises, ug ayaw ang Dios, aron kami dili mamatay.” Ang tawo, diha sa Presensiya sa Dios, makaamgo gayud nga siya usa ka makasasala! Bisan pa og sila, ang matag usa, na-sirkunsisyon na sumala sa Kasugoan. Gituman nila ang mga sugo ug tanan na, apan sa diha nga misulti ang Dios ug miduol sila ngadto sa Iyang Presensiya, naamgo nila nga sila sayup, nga sila—dili sila matarung, may sa kung unsa nga butang nga kulang kanila, tungod kay anaa man sila sa Presensiya sa Dios. Oo. Ug miingon sila, “Pasultiha si Moises, ug ayaw ang Dios, kay kon mosulti ang Dios mangamatay kaming tanan. Si Moises na lang ang pasultiha nganhi kanamo.”

<sup>20</sup> Anaa kini diha sa Lukas 5:8, nga sa dihang si Pedro... oh, sa usa pa siya kaniadto ka gahi’g-ulo nga tawo, ug usa ka dakung ma-impluwensya nga tawo, dakung kagahum nga sa atong hingbaloan. Sama siya sa usa ka maton, usa ka gibantog nga mananagat. Apan sa dihang nasaksihan niya ang milagro sa Dios nga gihimo sa usa lang ka ordinaryong Tawo, nga ingon niana, naila niya niadtong tungora nga nagkinahanglan kadto og usa nga labaw pa sa tawo nga magpaadto sa tanang isda ngadto sa iyang pukot, og nahibaloan niya kadto tungod nga bisan sa iyang nakat-onan, bisan sa iyang kahibalo sa pagpanagat, tibuok gabii na siyang nangisda ug wala man lang nakakuha ni usa. Apan nadungog niya ang usa ka Tawo nga nag-ingon, “Itaktak ninyo ang inyong pukot.”

<sup>21</sup> Ug sa gisugdan na niya pagbira, nakakuha siya og daghan kaayong mga isda, ug naamgo niya nga usa gayud siya ka tawong makasasala. Ug miingon siya, “Pahawa kanako, Oh Ginoo, kay ako usa ka tawong makasasala.” Kinsa ba’y misulti niana? Si San Pedro, diha sa Presensiya sa Dios, mihangyo nga mopahawa ang Dios gikan sa iyang atubangan, tungod kay naila niya ang iyang kaugalingon nga usa ka makasasala.

<sup>22</sup> Naila ni Abraham ang iyang kaugalingon nga “sayup.” Naila ni Adan ang iyang kaugalingon nga “sayup,” nga mao kaniadto ang anak sa Dios, naila ang iyang kaugalingon nga “sayup.” Naila ni Moises ang iyang kaugalingon nga “sayup.” Ang Israel, ingon nga usa ka iglesia ug nasud, naila ang ilang mga kaugalingon nga “sayup.” “Pahawa kanako, kay ako usa ka tawong makasasala.” Wala niya ginaingon, “Karon, balaan ako ug takus nga modawat niini.” Ang giingon niya, “Usa ako ka tawong makasasala.”

<sup>23</sup> Usa ka higayon kaniadto adunay usa nga nagpakaingon nga batid sa relihiyon, tungod sa tanang teolohiya nga iyang nakat-onan ilalum sa usa ka bantugang magtutudlo nga ginganlan og Gamaliel, ang iyang ngalan mao si Saulo nga taga-Tarsus, nga



mas nailhan nato ingon nga si Pablo, diboto gayud. Batid siya sa tanang kakutihan sa ilang relihiyon. Usa siya ka Fariseo sa mga Fariseo, ug usa ka Hebreohanon sa mga Hebreohanon. Usa siya ka inila nga tawo, usa ka eskolar, maantigo, maalista, edukado, nag-angkon nga nailhan na niya ang Dios gikan pa sa pagkabata. Apan usa niana ka adlaw sa iyang dalan didto paingon sa Damascus, misidlak ang Haligi nga Kalayo sa ibabaw niya ug napukan siya sa iyang. . . natumba siya, sa yuta, diha sa abug, ug miingon, “Ginoo, unsa ba ang buut Mo nga ipabuhat kanako?” Bisan pa sa tanan niyang kabatid, bisan pa sa tanan niyang pagkahanas sa teolohiya, bisan pa sa tanan niyang edukasyon wala gayud magpulos ang tanan niadto sa dihang nagtindog na siya diha sa Presensiya sa Dios.

<sup>24</sup> Gusto ko nga mohunong dinhi sa makadiyut lang ug isulti ang mao ra nga butang sa gihapon. Tingali og nagkaaduna ka og D.D., Ph.D., unsa man ang naabot mo, mahimong nagasimba ka na sukad kaniadtong bata ka pa, mahimong nabuhat mo na ang tanang mga pang-relihiyong bulohaton, apan kon anaa ka na diha sa Presensiya sa Dios bation mo gayud nga gamay ka lang kaayo ug walay bili.

<sup>25</sup> Naamgo ni Pablo nga siya sayup, ug natumba siya sa yuta, niadtong napailalum siya sa presensiya ug Gahum. Sa paghangad niya ug nakita ang mismong Dios nga iyang ginawali, ug. . . ginasupak, ug nagdahum nga naila niya, ug nakita nga siya sayup, natumba siya, sa yuta, tungod kay atua man siya sa Presensiya sa Dios. Nakita niya kadtong Haligi nga Kalayo.

<sup>26</sup> Unsa man usab ang bahin sa halangdon nga si San Juan diha sa Pinadayag 1:7, sa dihang gipakita kaniya ang kadtong panan-awon, ug napatan-aw, ug nadungog ang Tingog nga nagpakigsulti kaniya. Ug milingi siya aron makita niya ang Tingog, ug nakita niya ang kadtong pito ka mga kandilirong bulawan. Ug adunay Usa nga nagtindog sa taliwala sa pito ka mga kandilirong bulawan, nga may buhok nga daw balhibo sa karnero, mga mata nga sama sa nagasiga nga kalayo, mga tiil nga sama sa mga haligi nga tumbaga, binaksan Kini og usa ka bakus nga bulawan sa palibot sa dughan, ug gitawag Siya nga Pulong sa Dios. Ug kaniadto nagpakiglakaw na ang halangdon nga si San Juan kauban ni Cristo, nagpauraray sa Iyang dughan, nahimo na niya kaniadto ang tanan niining mga butanga! Maingon sa gikaingon ko na kaganinang buntag, nahimong mas labaw pa ang ministerio ni Pablo kang bisan kinsa man kanila. Dinhi, sa tapus nga nagpakiglakaw si Juan kauban ni Jesus kaniadto, nakapakigsulti Kaniya, natulog uban Kaniya, mikaon uban Kaniya, apan sa dihang nakita niya nga nagtindog Siya didto, diha sa usa ka gihimaya nga kahimtang, ingon niya nga nalukapa siya nga daw usa ka patay nga tawo diha sa Iyang tiilan. Amen. Hunahunaa kini!

<sup>27</sup> Makaanhi kita sa simbahan ug makapakig-istorya ug makapagdayeg sa Dios, ug uban pa, apan, oh, igsoon, pagmakita na nato Siya nga moabot, may sa kon unsang butang nga mamahimong lahi gayud sulod sa atong mga kasingkasing! Mahimong maghunahuna kita nga ginabuhat nato ang atong pang-relihiyon nga katungdanan pinaagi sa pag-adto sa simbahan ug paghatag sa atong mga ikapulo. Mahimong ginahunahuna nato nga ginatuman nato ang mga balaod sa iglesia ug nasaulo ang tanan nga mga kredo, apan sa higayon nga makita nato Siya sa makausa, mausab gayud ang kinatibuk-an nato. Oo, sigurado gayud.

<sup>28</sup> Kining halangdon nga tawo, nga si San Juan, usa ka halangdon nga tawo nga sama niana, ang giingon sa Biblia diha sa Pinadayag 1:7, nga, “natumba siya nga daw siya usa ka patay nga tawo.” Human sa tulo ka tuig ug tunga nga pag-uban-uban kang Cristo, nahimong usa sa mga magsusulat sa mga Sinulat, gisulat niya samtang nga nagsunod-sunod siya Kaniya, mikaon siya uban Kaniya sa kan-anan, natulog kauban Niya sa higdaanan, ug nagpakig-ambitay uban Kaniya sa bisan asa Siya nag-adto, apan sa paglingi niya aron sa pagtan-aw Kaniya, wala na’y kinabuhing nahibilin sa sulod niya. Natumba siya nga daw usa ka patay nga tawo ngadto sa salog, o ngadto sa yuta. Bueno.

<sup>29</sup> Makita nato si Isaias, dinhi sa Isaias 6:5, maingon nga bag-ohay lang natong gibasa, kining bantugan ug gamhanang propeta, usa siya sa mga pinakagamhanang mga propeta sa Biblia. Adunay saisentay-sais nga mga Basahon ang Biblia; adunay saisentay-sais nga mga kapitulo ang Isaias. Gasugod ang Isaias diha sa Genesis, gihulagway niya ang Bag-ong Tugon sa tunga-tunga sa Isaias, sa katapusan sa Isaias gihulagway niya ang Milenyum; sa ingon ka eksakto gayud sa Genesis, sa Bag-ong Tugon, ug sa Pinadayag. Tukma gayud! Usa kadto si Isaias sa mga medyor nga propeta. Apan usa niana ka adlaw ingon nga dugay na siyang nagapauraray sa buktion sa halangdong hari nga si Uzziyas, gikuha gikan kaniya si Uzziyas, ug nasubo siya sa hilabihan gayud. Usa siya ka buutan nga tawo, usa siya ka maayo og matarung nga tawo, gani giila siya sa maong matarung nga hari (nga usa ka buutan nga hari) ingon nga usa ka balaang tawo ug gipapabilin siya sulod sa iyang templo.

<sup>30</sup> Nakakita si Isaias og mga panan-awon. Usa siya ka propeta. Nagwali si Isaias sa Pulong. Usa siya ka ministro. Usa ka balaang tawo si Isaias. Apan usa niana ka adlaw, samtang nagatindog siya didto sa templo, nahiadto siya sa usa ka panan-awon ug nakita niya ang Himaya sa Dios. Nakita niya ang mga Manolunda nga may mga pako nga nagtabon sa Ilang nawong, mga pako nga nagtabon sa Ilang mga tiil, nga nanaglupad gamit ang mga pako, nga nagatuaw, “Balaan, balaan, balaan ang Ginoong Dios nga Makagagahum sa tanan!”

<sup>31</sup> Naamgo niadtong propeta nga wala gayud siya. Miingon siya, “Alaut ako, kay ako usa ka tawo nga mahugaw og mga ngabil.” Usa ka propeta, usa sa pinakagamhanang propeta sa Biblia, nga usa kanila. “Usa ako ka tawo nga mahugaw og mga ngabil, ug nagapuyo ako kauban sa mga tawo nga mahugaw og mga ngabil. Alaut ako, tungod kay nakita ko ang Himaya sa Dios.”

<sup>32</sup> Ug miingon siya, sa dihang mituaw ang kadtong Manolunda, “nangatay-og ang mga haligi sa templo.” Igsoon, makapahimo kana kanimo nga... Dili lamang ang mga haligi sa templo ang mangatay-og, kondili ang tibuok langit ug yuta ang mangatay-og pagmobalik na Siya pag-usab. Mokalagiw ang mga kabukiran, ug mahanaw ang dagat, ug may managsinggit, “Salipdi kami gikan sa nawong Niya nga nagalingkod sa Trono.” Mamahimo kining usa ka makalilisang nga panahon. Ginasulti ko kanimo, higalang makasasala, mas maayo pa nga susihon mo na ang imong kaugalingon. Husto kana.

<sup>33</sup> Karon, miingon si Isaias, “Alaut ako, usa ako ka tawo nga mahugaw og mga ngabil, ug nagapuyo ako kauban sa mahugaw nga mga tawo. Ug ako, ang kining mga tawo may mahugaw nga mga ngabil.”

<sup>34</sup> Karon hinumdumi, kon naila sa mga balaan nga kalalaken-an ang ilang mga kaugalingon nga “mga makasasala” diha sa Presensiya sa Dios, unsa na lang ang buhaton sa mga makasasala ug sa mga dili-diosnon sa nianang Adlaw? Unsa kaha ang buhaton sa mga tawong molingkod lang dinha sa mga panagtigum? Unsa kaha ang buhaton sa mga tawo nga nakakita na sa Gahum sa Dios, nadungog na ang maong ihap-nga-pinabalik diha sa Pulong, nakasaksi na nga ginapadayag sa Dios ang Iyang Kaugalingon, ug nakasaksi (nga wala’y ni anino sa pagduhaduha) nangatuman ang matag Kasulatan, ug ginapamugos sa gihapon nga makasulod ngadto sa Langit nga wala man lang natawo pag-usab ug wala man lang nadawat ang Espiritu Santo? Ang Biblia miingon, “Kung ang tawong matarung malisud man gani maluwas, unsaon na man pag-atubang sa makasasala ug sa mga dili-diosnon?” Asa kaha nato ilugar ang atong kaugalingon kon makita nato nga ginapadayag na sa Dios ang Iyang Kaugalingon mismo sa atong atubangan, ug makita ang Himaya sa Dios ingon sa nahitabo kaniadto sa maong mga kalalaken-an, ug nanagtuaw kadtong mananga sa mga tawo, mga propeta ug mga manggialamon nga kanila nahibase ang Pulong? Kon nanagtuaw sila, ug nanaghapa, ug nanagsinggit, “Usa ako ka tawo nga dili-balaan ang mga ngabil, dili-limpiyo,” unsa na lang kaha ang dangatan nianang tawo nga wala gani nagasugid sa iyang mga sala? Unsa na lang kaha ang mahitabo sa mga kabatan-onan nga dili mosugid sa ilang mga sala? Unsa na lang kaha ang mahitabo sa nianang dili-sinsiro nga tawo nga nagahunahuna nga mas nahibalo pa siya

bahin sa mga binuhat sa Dios kaysa sa Dios Mismo? Unsa kaha ang mahitabo sa nianang tawo nga gihurot ang tibuok niyang kinabuhi sa pagpaningkamot nga ipanghimakak ang Biblia? Asa kaha ang kapaingnan niana nga tawo? Hunahunaa ninyo kini!

<sup>35</sup> Pagpang-ebanghelyo kini. Kini na ang panahon sa pagtay-og sa mga tawo. Kini na ang oras nga gisulti sa Dios nga moabot ang panahon, giuyog Niya ang Bukid sa Sinai usa niadto ka higayon apan adunay moabot nga usa na usab ka pag-uyog, nga “dili lamang ang Bukid sa Sinai ang Iyang pagauyogon, kondili pagauyogon Niya ang tanan nga mahimong uyugon.” Apan nahimatikdan ba ninyo ang tanang uban pa nga bahin sa Kasulatan? “Apan magadawat kita og Ginghamarian nga dili matarug!” Alleluyah! Ang tanan nga mahimong matay-og tay-ogon gayud. Pagatay-ogon ang kalangitan. Pagatay-ogon ang yuta. “Mangahanaw ang mga langit ug yuta, apan kana nga Pulong dili gayud mahanaw. Kay sa ibabaw niining bato pagatukoron Ko ang Akong Iglesia, ug ang mga ganghaan sa Hades dili gayud makadaug Niini.” Ang tanan nga mahimong matay-og tay-ogon gayud. Apan magadawat man kita og usa ka Ginghamarian nga mao ang Pulong sa Dios Mismo, ug ang Dios mao ang Iyang Pulong. Wala man Niya ginatay-og ang Iyang kaugalingon. Amen! Oh, my! “Apan magadawat kita og Ginghamarian nga dili matarug,” dili kini matay-og, ang giingon ni Pablo nga usa ka manunulat nga Hebreohanon.

<sup>36</sup> Ingon niadto nga matang sa tawo ug ingon niadto nga matang sa lalaki, ingon niadtong panahona ug kung unsa ang ilang gibati! Kita man usab, sa atong mga kaugalingon, nakita nato ang Himaya sa Dios sama sa nakita sa maong mga kalalaken-an kaniadto. Oo. Nakita na nato Kini. Nakita nato ang Himaya sa Dios sama sa pagkakita Niini ni Abraham. Nakita nato ang Himaya sa Dios sama sa pagkakita Niini ni Moises, ang mao rang Haligi nga Kalayo, ang mao rang Gahum sa Dios, ang mao ra gihapon nga Cristo nga naga- . . . nagapadayag sa Iyang Kaugalingon, nga nagapasundayag sa Iyang Kaugalingon, ug nga ginatuman ang Iyang Pulong sa kaulahiing adlaw. Unsaon na lang nato pagduol kung ingon-niana, ug paglakaw ug taphaw lang ang pagtagad nato Niini? Unsaon na lang nato sa paglakaw ug magpabilin lang sa gihapon sa atong mga kredo ug mga denominasyon, ug wala man lang dawata ang Pulong sa Dios? Unsa na lang ang mahitabo kanato nianang Adlaw? Unsa na lang ang mahitabo kanato, pagmakita na nato ang Himaya sa Dios?

<sup>37</sup> Ang ubang mga tawo di man lang panumbaligon ug ila Kining himoong kataw-anan, ginakataw-an Kini sa uban, gitawag Kini sa uban nga fanaticismo, gitawag Kini sa uban nga telepatiya’g pangutok, gitawag Kini sa uban nga Beelzebub, bansagan Kini sa uban og bisan unsa na lang. Sama lang sa usa ka karaan nang panultihon, “Ang mga buangbuang

lang nga sul-ob ang sapatos nga may espayik-nga-lansang ang magalakaw nga diin mahadlok gani ang mga Manulonda sa pagtunob.” Husto kana. “Miingon ang buangbuang sulod sa iyang kasingkasing, ‘Wala’y Dios.’” Sa dihang makita sa tawo ang Dios nga hingpit gayud nga napadayag pinaagi sa Iyang Kaugalingong Pulong (dili nga pinaagi sa usa ka kredo; kondili pinaagi sa Iyang Pulong), ug dayon labyan lang Kini ug katawan lang Kini, usa gayud siya ka buang. Tungod kay, kini, ang Dios mao ang Pulong, ug klaro nga gipadayag sa Dios ang Iyang Kaugalingon ngadto kaniya, ug usa siya ka “buangbuang,” nag-ingon ang Biblia. Unsa na lang kaha ang mahitabo kaniya sa diha nga kinahanglan na niyang manubag nianang dapita? Kini—makalilisang gayud kini para sa maong tawo nianang Adlaw, sa mga dili-diosnon.

<sup>38</sup> Sa naghinulsol nga mga makasasala, bisan pa man, dili na kinahanglan nga mahadlok pa. Oh, dili na. Ang usa ka makasasala nga magahinulsol, nahibalo siya nga adunay usa ka dugoon nga Halad nga nagahulat, aron nga mobarug puli alang kaniya. Mao kana ang nagahatag kanako og kahupayan. Nakita ko ang Himaya sa Dios. Nabati ko ang Iyang gahum. Nakaila ako sa hikap sa Iyang kamot. Nakaila ako sa hikap sa Iyang pagpanton. Nakaila ako nga Siya mao ang Dios. Ug nasayod ko nga malaglag na ako, apan aduna gayu’y Usa nga nagabarug didto alang kanako. Amen. Adunay Usa Nga nagabarug didto ug nagaingon, “Amahan, ibutang ang tanan niyang kasal-anan nganhi Kanako, tungod kay mibarug man siya alang Kanako didto sa yuta.” Alleluyah! Dayon makalakaw ako paingon sa Trono sa Dios, nga dili mahadlok, nga may grasya sulod sa akong kasingkasing, nasayod nga dili kini pinaagi sa maayong mga binuhatan, kondili tungod sa Iyang kalooy nga naluwas ako. Dili sa kon unsa ang mahimo kong buhaton, kon unsa ang mahimo kong apilan, kon unsa ang mahimo kong isulti; kondili tungod sa Iyang grasya nga giluwat Niya ako.

<sup>39</sup> Dili ikatingala nga ang magbabalak nga nakasabot niana, misinggit, “Kahibulongang grasya, pagkatam-is nga tingog, nga nagluwas sa usa ka alaut nga sama kanako. Nahisalaag ako kaniadto, apan karon hingkaplagaan ako; buta kaniadto, apan karon makakita na ako.”

<sup>40</sup> Unsaon ko man sa pag-adto sa Langit? Unsaon mo man sa pag-adto sa Langit? Dili nato mamahimo kini, sa kaugalingon nato, ug walay paagi para mahimo nato kini. Apan adunay Usa nga mihimo og paagi. Ug Siya ang Dalan. Ug unsaon man nato pag-anha Kaniya? Pinaagi sa usa ka Espiritu, sa Iyang Espiritu, gibautismohan kita ngadto sa usa ka Lawas nga pagabanhawon sama sa usa ka pag-orbito. Manglupad kita gikan sa yuta ingon nga mga astronaut sa niining kaulahiing adlaw diha sa pagtoo sa Dios. Amen. Sigurado gayud. Sa naghinulsol nga mga

makasasala dili na kinahanglan nga mabalaka, adunay Usa nga atua na didto nga mobarug alang kanila.

<sup>41</sup> Oh, human nga miduol kita sa Iyang Presensiya karon, ug nasayran nato nga nakaanha kita sa Iyang Presensiya, nasaksihan nato Siya nga nagabuhat og mga butang nga ginahimo Niya niadtong dinhi pa Siya sa yuta. Unsaon man ninyo sa pagkahibalo . . . Unsaon man ninyo sa pagkahibalo kung unsa nga punoan ang inyong ginatan-aw? Tungod sa bunga nga ginapamunga niini. Unsaon man ninyo sa pag-ila kung unsa nga iglesia ang inyong ginaadtoan? Pinaagi sa bunga nga ginapamunga niini. Miingon si Jesus, “Ang nagatoo Kanako, magabuhat sa mao usab nga mga buhat nga ginabuhat Ko. Maganunot kini nga mga ilhanan ngadto kanila nga nagatoo.”

<sup>42</sup> Karon, makita nato nga wala Niya kita sukad giordenahan nga magtukod og mga denominasyon. Wala Niya kita sukad giordenahan nga maghimo og mga kredo. Kondili Iya pa gani kitang gipasidan-an batok niana. “Kay ang si bisan kinsa nga magataktak sa bisan unsang butang gikan Niini o magadugang sa bisan unsang butang ngadto Niini, pagataktakon usab, ang ilang bahin, sa Libro sa Kinabuhi.” Kita n’yo?

<sup>43</sup> Busa, wala kita giordenahan og bisan unsa man kondili sa pagpabilin lamang nianang Pulong. Ug kung ang usa ka tawo pinadala sa Dios, magpabilin gayud siya diha sa Pulong, tungod kay makapadala lamang ang Dios pinaagi sa Iyang Pulong. Kita n’yo? Kita n’yo, kinahanglan gayud Siya sa Iyang Pulong. Dayon pagmosulod kita sa Iyang Presensiya, pagnakasulod ang usa ka tawo ngadto sa Presensiya sa Dios, mabag-o gayud siya hangtud sa kahangturan, kung aduna ma’y bag-ohon diha kaniya. Karon, aduna pud kadtong mga makahimo sa pagduol sa Presensiya sa Dios ug wala Kini ginatagad. Dili siya ordinado alang ngadto sa Kinabuhi. Apan kon siya pinili nang daan sa Dios, sa diha mismo nga naigo siya nianang unang pagtawag, maila niya kini dayon. Magpadilaab kana.

<sup>44</sup> Tan-awa kadtong makaluluoy’ng bigaon didto niadtong adlaw sa Samaria, ang kadtong babaye. Siya atua sa dautan nga kahimtang diha sa panghunahuna ug sa pisikal. Nahibalo kita niana. Apan sa dihadiha nga nakita niya kadtong ilhanan nga natuman, bahin sa maong Mesias, miingon siya, “Nahibalo kami nga moabot ang Mesias aron buhaton kini. Ikaw na siguro ang Iyang propeta.”

Miingon Siya, “Ako mao kanang Mesias nga nahisulat nga moabot.”

<sup>45</sup> Naila kini sa babaye. Wala na siya’y usa pa ka pangutana. Miadto siya dayon dala-dala kadto nga responsibilidad, ingon nga nasayod nga kung nakaplagan niya kini ug nakasulod sa Presensiya sa Dios, katungdanan niya nga isulti ngadto sa uban ang mahitungod niini. Alleluyah! Husto gayud. Ang si kinsa

mang tawo nga makasulod sa Presensiya sa Dios aduna siya'y katungdanan sa atubangan sa Dios, sugod nianang higayona, nga isulti ang bahin niini ngadto sa ubang tawo. Tan-awa ninyo si Abraham, tan-awa si Moises, tan-awa si Pedro, tan-awa si Pablo. Sa higayon nga misulod sila ngadto sa Presensiya sa Dios, naamgo nila ang ilang mga kaugalingon nga "mga makasasala," ug giselyohan nila ang ilang testimonyo baylo sa ilang kinabuhi. Tan-awa ninyo kadtong makaluluoy'ng babaye, wala na gayud siya maglangan pa, miadto siya sa gilayon sa siyudad ug gisultihan ang mga tawo, "Umari kamo, tan-awa ninyo ang Tawo Nga nagsulti kanako sa mga butang nga nabuhat ko. Dili ba kini mao ang Mesias?" Dili nila mahimong ilimod Kini, tungod kay uyon man Kini sa Kasulatan. Sigurado gayud. Oo, kinahanglan nila nga buhaton kadto, sa usa ka tawo, pagnagkaaduna kita og responsibilidad sa pagsulti sa ubang tawo sama sa gibuhay ni Moises kaniadto, sama sa gibuhay ni Pedro, ug sama sa gibuhay ni Pablo. Human niining mga butanga, nga nasaksihan ninyo Kini ug nakasulod sa Iyang Presensiya, aduna kamo'y katungdanan nga dalhon ang Mensahe ngadto sa ubang tawo. Dili puede nga palingkod-lingkod na lang uban Niini. Kinahanglan nga dalhon ninyo Kini ngadto sa uban.

<sup>46</sup> Nahinumduman ko ang usa ka tigulang nga igsoong babaye nga kanunay'ng nagatambong dinhi kaniadto, ang inahan ni Igsoong Graham Snelling, kanunay siya dinhi sa iglesia, ug moawit siya'g, "Dili ko mapugngan nga mosangyaw! Ako'y nagadagan, nagadagan, nagadagan, ug magasangyaw ako ug dili nga maglingkod-lingkod lang." Nakaplagn niya ang usa ka butang. Nakaadto ako kaniadto sa usa ka gamay'ng iglesia sa mga igsoong itum dinhi sa Louisville, ug tanan sila nanagtindog, nga nagaawit, "Nagadalagan ako diha sa dakung-Dalan sa Hari, nakaplagn ko Kini, ug ginasubay na ang maong Dalan!"

<sup>47</sup> Aduna sa kung unsang butang bahin niini, sa dihang makaplagn mo si Cristo, dili na gayud nimo mahimo nga magpakahilom. Sa nahabilin nimo nga mga adlaw usa ikaw ka nabag-o na nga tawo, kay sa diha nga ang kinabuhi ug ang Kinabuhi nagkatagbo, nagahatag kini og madan-ag nga Suga. Tinuod gayud. Pagmakonekta na ang bombilya diha sa kuryente, kung husto kini nga bombilya, mohatag gayud kini og kahayag; sa dihang nagkatagbo ang kuryente ug ang bombilya, wala na'y laing mahitabo kondili magakaylap sa palibot ang kahayag. Siguradong buhaton niana kini. Ug kon ang usa ka lalaki o usa ka babaye pinili nang daan ngadto sa Kinabuhing Walay Katapusan, ug makita nila ang kuryente sa Dios nga nagakonekta na nianang bombilya, magapakaylap gayud ang Kahayag sa bisan asa nga mahimo niini. Mahimong dili ka man molabaw sa napulo nga watt, apan ipakaylap lang kung unsa man nga Kahayag diha kanimo. Kung wala man ka og lima-kagatus nga watt, ipakaylap ang napulo nga watt nga Kahayag.

Ipaambit ang imong Kahayag! “Tugoti ang imong suga nga magasidlak ngadto sa mga tawo, aron hingkit-an nila ang imong mga maayong buhat ug himayaon nila ang imong Amahan nga atua sa Langit.” Oo, sir.

<sup>48</sup> Sa dihang matagbo sa usa ka tawo ang Dios, maamgo niya ang iyang kaugalingon nga “dili gyud maayo.” Unsaon man sa usa ka tawo nga maglakaw ug maghinambog bahin sa kon unsa siya ka bantugan ug kon unsa ang tanan niyang nahimo, nga sa pagkatinuod wala man gayud siya’y bili? Wala gayud siya’y bili sa sugod pa lang. Usa niana ka adlaw didto sa Memphis, Tennessee, o sa usa ka. . . Dili ko sigurado kung sa Memphis ba kadto. Basta usa kadto sa mga lugar didto. Kauban ko si Igsoong Davis ug nagkaaduna kami og usa ka—usa ka rebaybal niadto. Tingali og didto gayud kadto sa Memphis. Ug didto kami, sulod sa usa ka coliseum, ug aduna sila didto og, dili nga usa ka coliseum, daw sa usa kadto ka art gallery, ug aduna sila og—og dagkung mga rebulto nga gikan pa sa nagkalainlaing bahin sa kalibutan, nga nagkasagolsagol, adunay Hercules og uban pa, ug mga dinibuho sa mga bantugan nga pintor. Ug gisusi nila niadtong tungora ang bahin sa usa ka lalaki nga may kabug-aton nga usa ka gatus ug singkwenta ka libras. Nasayod ba kamo kung pila, kung pila ang kantidad niadtong lalaki? Otsenta’y-kuwatro sentimos. Ingon niadto lamang ang kantidad niya. Otsenta’y-kuwatro sentimos ang kantidad sa tanan—tanan nga mga kemika nga mahimo nimong makuha gikan kaniya. Sigo lang sa gisohan nga pangsabwag sa pugaran, ug ingon-niana lang siya, ingon niana lang ka gamay nga calcium, ingon niana lang ka gamay nga potash. Nagkantidad lang tanan og otsenta’y-kuwatro sentimos. Apan gigahinan gayud nato og panahon ang otsenta’y-kuwatro sentimos ug ginabebe-bebe pa.

<sup>49</sup> Dihay duha ka mga batan-on nga nagatindog didto, ug nagtan-awanay sila, miingon, “Jim, dili man diay daku ang kantidad nato?

Miingon siya, “Mao, lagi, John.”

<sup>50</sup> Miingon ko, “Pero kadali lang, mga dong, may kalag kamo sa sulod dinha nga nagkantidad og napulo ka libong kalibutan, nga natubos, mahimong tuboson pinaagi sa gahum sa Dios, kung inyo lang gayud kining dawaton.”

<sup>51</sup> Ang tawo, pagmakita niya kini nga mga butang, aduna siya’y katungdanan nga isulti kini ngadto sa uban. Nasaksihan ko kini niadtong usa pa ako ka bata. Gigahin ko ang tibuok kong kinabuhi niini. Gikasubo ko lang nga aduna ra ko og usa ka kinabuhi, aduna pa lang unta ko og napulo ka libo nga kinabuhi. Kung aduna lang ko og Eternidad, gusto ko sa gihapon sultihan ang mga tawo mahitungod niini, tungod kay kini na ang pinakahalandangdong butang nga akong hingkaplagan sukad-sukad. Kung basahon ninyo diha sa



Ezekiel 33, sa ika-33 nga kapitulo sa Ezekiel, adunay usa ka magbalantay kaniadto nga nahimutang ibabaw sa torre, ug kini nga magbalantay aduna siya'y katungdanan nga bantayan ang tibuok nga siyudad. Amen. Karon, pukawa, pukawa sa kadali ang inyong mga kaugalingon ngadto sa inyong espirituhanong konsensiya, samtang hisgotan ko kini nga Kasulatan. Kadto nga magbalantay kinahanglan nga usa gayud ka binansay nga lalaki. Kinahanglan nga nahibalo siya sa kon unsa ang iyang ginabuhat, nga bisan unsa pa ka halayo, sa diha nga paingon pa lang sila, ang kaaway, mahisayran niya dayon kini. Masulti niya kung unsa na kahaduol kini, maila niya ang bandera niini, masulti niya ang gidaghanon ug ang lumbay niini. Hangtud sa pinakahalayo nga matan-aw sa tawo, makita niya kini. Ug atua siya sa mas hataas kay sa tanang uban pa kanila, kay binansay siya aron hibaloon ang kaaway. Ug tulubagon niya sa Dios ang tibuok nga siyudad. "Magbalantay, unsa man ang gabii?" Alleluyah!

<sup>52</sup> Ingon niana usab ang mga kasundalohan sa Dios. Binansay sila diha sa Pulong. Kon adunay moabot nga mora'g pinasinaw lang, may dalang butang nga wala sa Kasulatan, pahimangnoan nila dayon ang ilang kongregasyon. Ang bisan unsa man nga wala sa Biblia, ang bisan unsa man nga dili—dili sa Dios, sama sa pagpahigayon og mga pang-sosyal nga panihapon, mga sayawan, ug tanang uban pa, aron mabayran ang mga pastor. Sayup kana nga mga butang. Kanang mga dula nga bunco ug mga pag-party-party sa pagdula og baraha sulod sa mga kasimbahanan, sayup gayud kana! Ug ang tinuod nga magbalantay nga gikatudlo ibabaw didto sa torre, nga sa makausa gikan na diha sa Presensiya sa Dios. . . Kung kini wala sa puwesto niya ibabaw didto sa torre, nga kinahanglan nakapuwesto siya ibabaw didto sa torre, tingali susama lang sa kongregasyon ang malantaw sa kuta. Apan kung tinuud siya nga magbalantay, ipausbaw gayud siya sa Dios ngadto sa dapit nga dili gayud maabot sa uban pa kanila. Apan ginabantayan niya ang panon, ug tulubagon niya kini sa Dios! Ang tawo sa Dios nga nagabarug diha sa Presensiya sa Dios, ug nahibalo nga ang Dios Dios, ug nahibalo nga ginatuman sa Dios ang Iyang Pulong, ug nasaksihan ang Dios nga ginabuhat Niya Mismo ug ginabuhat ang Iyang katungdanan ug ginatuman ang Iyang Pulong, nan bisan unsa pa kadaghang organisasyon o denominasyon ang mosulay sa pagguba Niini, nahibalo na siya sa gidaghanon ug sa kasarang sa kaaway. Amen. Nasayod siya kung unsa ang isulti ngadto sa kongregasyon, kini ang tinuud nga magbalantay.

<sup>53</sup> Kung ginapahayag nato nga mao Siya, nga nakasulod kita sa Iyang Presensiya, ug gisugid na nato ang atong mga kasalanan, gipanas na kini diha sa libro sa Iyang memorya. Walay si kinsa man ang makahimo niana kondili ang Dios lamang. Karon, makabuhat kamo og bisan unsa man kanako, pasayloon

ko kamo, apan ako kining mahinumduman. Kung makabuhay man ako og bisan unsa kaninyo, mahimong pasayloon ko ninyo, apan inyo kining mahinumduman. Apan mahimo sa Dios ang magpasaylo ug kalimtan kini. Hunahunaa kana, “dili man lang kini mahinumduman!” Amen. Nagahatag kana kanako og maayong pagbati. Nga dili na kini hinumduman pa, wala’y makahimo niana kondili ang Dios lamang. Wala’y makahimo niana kondili ang Dios lamang. Miingon Siya nga Iya kining panason sa Iyang libro sa memorya. Dili ko mahimo kini, dili mo mahimo kini, tungod kay aduna lamang kita og limitado nga sensya. Apan Siya wala’y-kinutuban, nga Dios, mahimo Niya nga bug-os Niyang hikalimtan nga nabuhay kini. Amen.

<sup>54</sup> Adunay usa ka dalaga nga gikan sa usa ka iglesia sa probinsya, ug ang iyang amahan usa ka tawong pangkinaraan pa, daku ang tingog nga magwawali, o miyembro sa iglesia. Ug busa mibalhin ang maong dalaga ngadto sa siyudad, ug nakig-uban-uban siya sa mga kababayan-an didto, ug manglihok na nga sama kanila, ug nagsunod na sa mga urog. Ug usa niana ka adlaw medyo naulaw siya nga mobisita ang iyang papa ug mama, o ang iyahang amahan, diay, kay patay na ang iyang inahan. Busa ang tigulang lalaki, ang ginahimo lamang niya, mobangon sa buntag, mokaon sa iyang pamahaw ug mokuha og Biblia ug magbasa Niini, ug modangulngol ug moampo ug mosinggit sa tibuok adlaw, ug modagan paadto paanhi sa kuwarte, ug medyo naulaw gayud ang maong dalaga bahin niini. Dayon—unya bisan dis oras na sa gabii, kung makagunit na kadtong amahan og Biblia, masugdan Kini’g basa, mobangon kini sa higdaanan, ug mosinggit, “Himaya sa Dios! Alleluyah! Oh, himaya sa Dios!” Mag-undak undak ug magdangulngol sa tungang-gabii.

<sup>55</sup> Busa usa niana ka adlaw kining dalaga adunay ginapaabot nga mga bisita nga kaubanan niya sa ginatambongan nga simbahan para sa usa ka gamay’ng tea party sama sa kanunay na nilang ginabuhay, kabalo na mo, busa dili na siya kahibalo sa kung unsa ang buhaton niya sa iyang amahan. Bisan pa man, amahan niya kini. Busa nagdesisyon siya nga iya na lang pasakaon ang iyang amahan didto sa attic ug miingon, “Daddy, dili man ka siguro gustong moapil dinhi sa silong nga may mga kababayan-an, dili ba?”

Miingon, “Ayaw na, sa hunahuna ko dili na kinahanglan.”

<sup>56</sup> Miingon siya, “Bueno, aduna kita’y mga bisitang kababayan-an nga taga-simbahan karong adlaw, ug magkaaduna kami og usa ka gamay’ng panagtigum, usa ka gamay’ng panagtigum sa pagpangampo. Mao nga akong—hangyoon ko ikaw, dad, nga mas maayo pa sigurong didto na lang ka sa attic?”

Miingon, “Siguro mao na lang kana ang akong buhaton.”

57 Busa miingon kining dalaga, “Basaha lang kining maanindot nga libro.” Ug gitagaan sa dalaga ang amahan og hiyograpiya. Gitago ang Biblia sa amahan aron maghilom kini. Nahibalo siya nga kung mobasa kini og Biblia, aba, maghimo lang kini og daghang kasaba didto. Mao nga atua lang ang maong amahan didto sa taas, kabalo na mo, diin pud sila nagkaaduna og ilang party. Busa gihatagan niya kini og hiyograpiya, miingon, “Maanindot kini. Basahon mo kini, daddy, tungod kay sultihan ka niini sa tanang kamatuoran bahin sa kalibutan.”

Bueno, miingon, “Malipay ako nga basahon kana.”

58 Busa miingon siya, “Saka ka na didto karon ug ayaw gayud og pagsaba-saba didto hangtud nga manguli kining mga kababayan-an, ug dayon akong . . .puede ka na monaug ug buhaton kung unsa man ang gusto mo.” Miuyon pud ang amahan. Busa misaka na siya, nagpahimutang didto.

59 Ug gipahigayon na nila ang ilang tea party, kabalo na mo, nagahisgotanay bahin sa *ingon niini-ug-ingon niana*, ug kabalo na mo kung unsa kini, nagkasadya sila didto. Ug kalit lang dunay naglabunog-labunog sa taas, nagsinggit ug naglukso-lukso, ug nangahulog ang mga bulit sa kisame. Ang tigulang nga lalaki nagdagan-dagan paadto-nganhi didto sa attic kutob sa iyang mahimo, nagalukso-lukso, ug nagasiyagit, “Himaya sa Dios! Himaya sa Dios!” Wala kabalo kadtong mga kababayan-an kon unsa na ang nahitabo didto sa taas, kon unsay atua didto sa taas nila. Busa dalidali nga minaug ang maong tigulang, kutob sa iyang mahimo.

Miingon ang maong babaye, “Daddy, di ba gihatagan ta man ka og hiyograpiya aron basahon.”

60 Miingon, “Oo, kabalo ko. Kabalo ka ba,” miingon, “nabasa ko sa niining hiyograpiya dinhi kon diin adunay mga lugar diay sa dagat nga wala gayu’y kahiladman.” Ug miingon pa, “Nabasa ko man gud sa Biblia kagahapon, nga giingon Niya nga Iya nang gilabay ang akong mga kasal-anan ngadto sa ‘dagat sa pagkalimot.’ Himaya sa Dios! . . .? . . .” Miingon, “Padayon kini nga nagakaunlod ug nagakaunlod. Wala gayu’y kalugdangan, dire-diretso kini nga nagakahulog.” Husto kana. Ug ginasinggit niya og bahin niini. Bueno, husto kana.

61 Ginabutang sa Dios ang atong mga kasal-anan ngadto sa dagat sa pagkalimot, ginapapas kini, ug daw sa wala gayud kini nahitabo. Oh, my! Kung ingon-ana magabarug kita pinaagi sa grasya sa Dios, pinaagi ni Jesus Cristo nga atong Ginoo, ingon nga mga putli ug balaan, nga ingon ka balaan sama Kaniya, tungod kay ako ang Iyang makita pagmoadto na ko didto, ang makita Niya mao ang Kaugalingon Niyang Anak. Ang bugtong paagi nga mahimo Niyang makita . . .Dili na ako ang makita, tungod kay anaa na man ako sa Iyang Anak. Ug ang Iyang Anak lamang ang makita Niya. Dili ba pagkamaanindot niana? Dili na

nato kinahanglan nga hunahunaon pa ang bahin sa mga kasal-anan, kining tanan wala na, napailalum na kini sa Dugo. Oo, sir. Dili na nato kinahanglan nga mabalaka pa bahin niini, kining tanan nawagtang na, ug wala na sa hunahuna sa Dios. Dili na gani Niya kini mahinumduman pa.

<sup>62</sup> Si Isaias, ang gamhanan nga propeta, sa dihang nagsugid siya sa iyang mga sala, miingon siya, “Alaut ako, kay ako usa ka tawo nga mahugaw og mga ngabil.” Usa ka propeta! “Ako usa ka tawo nga mahugaw og mga ngabil, ug mahugaw usab ang akong kongregasyon.” Kita n’yo? “Ang mga tawo nga akong ginawalihan, mga mahugaw usab sila. Mahugaw ako. Ug alaut ako. Apan aniyang nanganaug nga usa ka hugpong sa mga Anghel gikan sa Himaya sa Dios, ginapalid ang—ang mga panganod, ug mihangad ako didto ug nakita ang Iyang himaya milukop sa tibuok nga Langit. Ug nagpaniid ako sa niining mga Anghel nga wala gayud kahibalo kon unsa ang sala. Wala gani sila nahibalo kon unsa gayud ang sala, ug didto, sa Presensiya sa Dios, aduna sila og mga pako nga nagtabon sa ilang mga nawong, aduna sila og mga pako nga nagtabon sa ilang mga tiil, ug nanagluwad sila gamit ang duha ka mga pako, ug nanagtuaw sila adlaw ug gabii, ‘Balaan, balaan, balaan ang Ginoong Dios.’” Whew. Mabati mo gayud nga makasasala ka tungod niana, di ba? Karon, unsa may gihimo niya? Miingon siya. “Alaut ako.”

<sup>63</sup> Ug sa dihang nagsugid siya sa iyang mga sala ug miingon “alaut ako,” miadto ang Anghel ug nagkuha sa mga kumpit, nagkuha og usa ka baga sa kalayo nga nagrepresentar sa Espiritu Santo ug Kalayo, ug miduol ug gipahid kini sa mga ngabil sa propeta, ug miingon, “Gihinloan ko na ikaw.” Dayon ginapalid sa mga pako nga sama niana, ginapalid kadtong mga tabil sa panahon, ug nadungog niya ang Dios nga nag-ingon, “Kinsay moadto alang kanamo?”

<sup>64</sup> Apan human nga hingsayran niya nga adunay paagi aron nga matangtang ang sala, gusto sa Dios nga adunay usa nga moadto alang Kaniya, ug miingon siya, “Ania ako, paadtoa ako.” Gikan na siya sa Presensiya sa Dios, ug naghimo na’g pagsugid sa iyang mga sala, ug nahinloan na ang iyang mga sala, ug andam na alang sa pag-alagad. Amen.

<sup>65</sup> Maingon niadtong magbabalak nga nakasabot niana, ang miingon, “Minilyon karon ang anaa sa kasal-anan ug kaulawan ang naghimalatyon, paminawa ang ilang pagkamasulob-on ug pagkapait nga pagtuaw. Pagdali, igsoon, pagdali sa pagluwas kanila; sa gilayon kang motubag, ‘Ginoo, ania ako.’”

<sup>66</sup> Kung pamalandungon ko ang Africa, India, ug ang tibuok kalibutan, minilyon nga mga pagano ang nanagsinggit ug nanagtuaw alang sa kalooy, ug kinsa ba ang moadto? Dili nga hatagan lang sila og gagmay’ng basahon, kondili dalhon sila ngadto kang Jesus Cristo. Usa ka tawo nga anaa sa Iyang

Presensiya, sama ni Moises, nga mosangyaw didto ug ipakita kanila ang tinuod nga kagawasan. Dili nga ipamiyembro sila sa usa ka iglesia, o magpakiglamano ug magkaaduna og kredo, kondili ang maghatud og kagawasan sa ilang kalag; usa gayud ka tawong balaan. Oo, bisan si Isaias nagsugid sa iyang mga kasalanan ug nahinlo siya.

<sup>67</sup> Human nga nagpakigbugno si Jacob tibuok gabii, sa pagsugid niya sa iyang mga sala, mahinumduman n'yo pa ba ang lugar kung asa siya niadtong tungora? Ginganlan kadto og Peniel, P-e-n-i-t-e-l, Peniel. Ang pulong nga *Peniel*, sa Hebreohanon, nagkahulogan og “ang nawong sa Dios nga Makagagahum sa tanan,” Si Jacob, tawong medyo tikasan nga mikalagiw. . . ang ngalan niya’y *Jacob*, nga nagkahulogan og “mangingilog,” maglilimbong, nga sa tibuok niyang kinabuhi mikalagiw, palayo gikan sa Dios, apan usa niana ka higayon sa dihang nahiadto siya sa Presensiya sa Dios didto sa Peniel, naatubang niya ang Dios, nakagunit siya sa Dios ug wala gayud niya Siya buhii. Dios, nagkinahanglan kami og daghan pa nga mga Jacob. Mipabilin siya didto sa atubangan sa Dios, sa Presensiya sa Dios, nanggunit siya hangtud nga pasubang na ang adlaw. Miingon ang Dios, “Buhii Ako, tungod kay ang adlaw mosubang na.” Ug nanggunit siya nga naatubang ang Dios hangtud nga pasubang na ang adlaw, apan mihawa siya nga gipakamatarung ug naluwas na. Huh.

<sup>68</sup> Oh, kon daw sa unsa ka maanindot nga butang kadto, karon, ang mahibaloan nga nakigbugno siya kaniadto. Kana nga, nakita na niya kaniadto ang mga ilhanan sa Dios, nagkaaduna na siya og mga damgo mahitungod sa Dios, apan sa niining higayon naatubang gayud niya ang Dios, napaanaa sa Presensiya sa Dios. Hunahunaa kini, mga higala. Karon, sa diha nga dalion nato. Diha sa Presensiya sa Dios, mausab gayud ang tawo. Nausab si Jacob kaniadto. Karon mahimo na siyang molakaw nga kauban ang Dios. Oo, lahi na siya kay sa kon unsa siya kaniadto sa pag-adto niya didto. Human na ang pagpakigbugno. Oo, sir. Ug nagsugod na siya nga magtukod og altar. Dili niya batasan nga magtukod kaniadto og mga altar, kabalo na mo. Apan, sulthihan ko kamo, sa dihang makaduol kamo sa Presensiya sa Dios, gusto na ninyo nga magtukod og altar kon asa man. Gusto ninyong makapangita og lugar kon diin nga kamo makaampo. Nagtukod siya og altar. Nahinlo siya, ug midaug ang Dios.

<sup>69</sup> Ug ang ngalang Jacob giusab gikan sa *Jacob*, “mangingilog,” nahimong *Israel*, “usa ka prinsiphe, nga nakigbugno sa Dios.” Ingon niana ang nahitabo kang Jacob. Ang mangingilog, ang maglilimbong, ang dili-matarung, ang makasasala, ang maglilimbong, naglingla sa iyang igsoon, giilog ang pagkapanganay, maingon sa nahitabo kaniadto, gikan sa iyang magwang, pinaagi sa pagpanikas, usa ka maglilimbong. Gilingla

niya ang iyang ugangang lalaki. Nagbutang siya og mga sanga sa alamo ug mao nga na-kabang ang mga nating baka, sa dihang ang buros nga mga baka moadto didto, magsud-ong niini, ug ang karnero . . . magsud-ong niadtong puntik-puntik nga sanga ug himoong kabang ang ipanganak nga mga baka, aduna na'y mga marka sa panit. Maglilimbong, gilimbongan ang kaugalingon niya nga ugangang lalaki. Gilingla ang iyang inahan, gilingla ang iyang amahan, gilingla ang iyang igsoon, apan sa dihang nahiadto siya usa niana ka higayon sa . . . Usa siya ka tikasan. Mokalagiw siya bisan asa na lang, kanunay nagapahilayo gikan sa Dios, nagapahilayo gikan sa iyang igsoon. Apan sa diha nga nakasulod siya sa Presensiya sa Dios, naila niya nga siya usa ka makasasala. Unsa ang gibuhat niya? Unsa man ang gibuhat niya? Nakita niya ang iyang kahigayonan. Nahinagbo niya ang usa ka butang nga wala gayud niya mahunahunaan kaniadto, ug nagpabilin siya didto hangtud nga giwagtang ang tanan niyang mga sala. Oh, my! Gidala siya sa Dios diha sa Iya Mismong Presensiya.

<sup>70</sup> Nagahimo ang Dios og paagi aron makaduol ang mga tawo sa Iyang Presensiya, dayon sila na mismo ang magdesisyon. Ang uban kanila mopahilayo gikan Kaniya, may uban pud nga modangup Kaniya. Kung sila pinili nang daan ngadto sa Kinabuhi, toohan nila Kini, ug magapabilin sila Niini. Kung sila dili mga pinili, maninguha silang mopahilayo ug moingon “Wala’y nada Kana.” Kita n’yo? Ug ingon niana ang tawo nga nalaglag. “Ang tawo nga nagasugid sa iyang sala, makabaton og kapasayloan. Kung ginatago mo ang imong sala, dili ikaw mouswag.” Dili gayud.

<sup>71</sup> Busa si Jacob sa dihang siya, kabalo na mo, nahinagbo niya pagkasunod adlaw si Esau nga iyang igsoon. Wala na siya nagkinahanglan og tabang gikan kaniya niadtong tungora. Wala siya nagkinahanglan sa iyang mga kasundalohan. Buluhaton na niya ang pagtukod og mga halaran. Wala na siya nahadlok kang Esau.

<sup>72</sup> Mga Salmo 16:8, miingon si David, “Gibutang ko ang Ginoo sa atubangan nako.” Kini ang maayong butang nga pagabuhaton. Mga Salmo 16:8, “Gibutang ko ang Ginoo sa atubangan nako.” Aron nga, dili siya malibog niini. Gusto niya nga magmahunahunaon sa Presensiya sa Dios, busa miingon si David, “Gibutang ko ang Ginoo sa kanunay sa akong atubangan. Karon ako, si David, gibutang ko ang Ginoo sa akong atubangan, aron nga kanunay magmahunahunaon—magmahunahunaon sa Presensiya sa Dios.” Dili ba usa kana ka maayo nga leksyon para kanatong tanan karong gabhiona? Ibutang nato ang Ginoo sa atong atubangan aron nga magmahunahunaon kita sa Presensiya sa Dios. Ipa-una Siya. Ngano man? Ipa-una Siya, diha sa imong atubangan. Ngano man? Tungod niana dili na kamo magpakasala pa kung bug-os kamo nasayod nga anaa kamo diha

sa Presensiya sa Dios. Kung nasabut ninyo nga ang Dios anaa sa palibot, ginabantayan mo kon unsay imong ginasulti.

<sup>73</sup> Ang usa ka tawo, sa dihang nagahunahuna siya nga wala ang Dios, mamalikas siya, mangibog siya og mga babaye, mobuhat siya. . . mangawat siya, manglimbong, mamakak. Buhaton niya ang bisan unsa pagmahunahuna niya nga wala nakakita ang Dios kaniya. Apan dad-a siya ngadto sa Presensiya sa Dios, undangan niya kini dihadiha mismo. Kita n'yo? Ug miingon si David, "Gibutang ko ang Ginoo sa kanunay sa akong atubangan." Usa kana ka maayo nga butang. Dili ikatingala nga miingon ang Dios nga usa siya ka tawo nga tukma sa Iya Mismong kasingkasing. Buhaton sa tawo ang tanan pagmahunahuna niya nga ang Dios wala dinha sa duol. Apan pagmahunahuna niya nga anaa ang Dios dinha sa duol, nahimatikdan na ba ninyo ang makasasala? Paduola kaniya ang usa ka tawo nga diosnon, moundang siya dayon sa iyang pagpamalikas, kung aduna lang siya og unsa man nga pagtahod. Kita n'yo? Likayan niya ang pagsulti og mga mahugaw nga katis-tisan nga nasulti na niya unta. Kita n'yo? Kita n'yo, undangan niya kana, tungod kay nahibalo siya nga anaa siya dinha sa Presensiya sa Dios, kay ang Dios nagapuyo man sa tabernakulo diha sa Iyang mga katawhan. Kita n'yo?

<sup>74</sup> Human nga gisulti ni David kadto, miingon siya, "Magamaya ang akong kasingkasing." Hinaut ko nga basahon ninyo kining, Mga Salmo 16. "Magamaya ang akong kasingkasing, ug ang akong unod magapuyo sa kasigurohan." Ngano man? Magamaya ang akong kasingkasing tungod kay aduna man ako'y Dios sa akong atubangan sa tanang panahon. "Ug ang akong unod magapuyo sa kasigurohan; kung ako mamatay, pagabangunon ako pag-usab. Kay dili Niya pagatugotan ang Iyang Balaan nga makakita sa pagkadunot, ni pagabiyaan Niya ang Iyang kalag sa sheol." Kita n'yo? Niadtong gibutang ni David ang Dios sa iyang atubang, ug naghunahuna sa kanunay nga anaa siya sa Presensiya sa Dios. "Unaha ninyo pagpangita ang gingharian sa Dios."

<sup>75</sup> Paminaw kamo karon, iglesia, gimahal ko kamo. Ug gusto ko nga maminaw kamo kanako karon. Maingon sa kanunay nang ginaingon ni Igsoong McCullough, "Aduna ako'y isulti." Ibutang ninyo sa kanunay ang Ginoo sa inyong atubang, ug dili gayud kamo magbuhat og bisan unsa nga dili ninyo buhaton kung anaa kamo sa Iyang Presensiya, tungod kay Siya nagatan-aw diha kaninyo. Kita n'yo? Ang Ginoo nagapahaluna palibot sa mga nangahadlok Kaniya. Wala Siya. . . Nagapabilin lamang Siya dinha mismo sa duol ninyo. Ug nahibalo Siya sa tanan nga ginabuhat ninyo, ug kinahanglan nga nahibalo kamo niana. Pagmosugod na kamo sa pagsulti og bakak, ayaw gayud ipadayon, hinumdumi, ang Dios nagapaminaw kaninyo. Pagmosugod na mo og diyutay'ng pagpanlimbong, ayaw gayud

ipadayon, nagalantaw ang Dios kaninyo. Pagmosugod na mo og gamit sa Iyang Ngalan sa walay kapuslanan, ayaw gayud ipadayon, nagapaminaw kaninyo ang Dios. Pagmosugod na mo sa pagpanigarilyo, Siya nagalantaw kaninyo. Kita n'yo? Siya. . . Pirme nato kini ginakanta kaniadto, “Sa tanang dalan ngadto sa tinuod nga pinuy-anan sa kalag, anaa ang mata nagabantay kaninyo; sa inyong matag lakang, kining halangdong mata nagtukaw, anaa ang mata nagabantay kaninyo” Hinumdumi, buhata ang sama nga gibuhay ni David, kanunay nga ibutang ang Ginoo sa inyong atubang. Dayon magamaya ang inyong kasingkasing ug ang inyong unod magapuyo sa kasigurohan, kay gisaad na Niya kini. Oo, sir. Nasayod si David nga pagabanhawon gayud siya tungod kay gisaad na man kini sa Dios. Bueno.

<sup>76</sup> Pagnakasulod na kita ngadto sa Iyang Presensiya, mabag-o gayud kita, dili na kita ang mao ra sa gihapon kaniadto. Tan-awa balik ang tanang mga kapanahonan, sa tanan na nga matang sa kinabuhi, sa tawo. Tan-awa ninyo si Abraham. Moingon mo, “Bueno, para lang sa mga ministro ang gibag-o na nga kinabuhi.” Oh, dili. Para gayud sa tanan ang gibag-o na nga kinabuhi. Kita n'yo?

<sup>77</sup> Karon, si Abraham kaniadto usa ka mag-uuma, apan sa dihang nadungog niya ang Tingog sa Dios nga nagapakigsulti kaniya, ug nakita kadtong panan-awon, usa siya ka gibag-o na nga tawo sugod niadtong panahona. Gihimulag niya ang iyang kaugalingon gikan sa iyang mga paryente, gikan sa tanan niyang mga kauban, ug naglakaw ingon nga usa ka magpapanaw ug usa ka lumalangyaw, sa usa ka yuta nga dili iyang lugar, sa tibuok niyang kinabuhi, nga nagapuyo lang sa mga balongbalong, tungod kay klarong gipahayag niya nga ginapangita niya kadtong lungsod kinsang Magtutukod ug Magbubuhay mao ang Dios. Nasayod siya nga aduna'y Dios, ug aduna'y usa ka lungsod kon asa man nga Ang Magtutukod ug Magbubuhay niini mao ang Dios. Mao kana'y ginasulti sa Mga Hebreohanon 11 kanato, nga ginapangita niya ang usa ka lungsod nga ang Magtutukod ug Magbubuhay niini mao ang Dios. Usa siya ka gibag-o na nga tawo, bisan nga usa lang siya ka yanong mag-uuma kaniadto. Apan nakakita siya og usa ka panan-awon ug nakaadto sa Presensiya sa Dios, ug usa siya ka gibag-o na nga tawo sugod niadto.

<sup>78</sup> Si Moises, usa siya ka magbalantay kaniadto, apan usa siya ka gibag-o na nga tawo sa dihang nakasulod siya sa Presensiya sa Dios. Usa siya ka talawan kaniadto, mikalagiw siya kang Faraon, lakip sa tibuok nga kasundalohan nga naggukod kaniya. Apan uban sa usa ka sungkod nga dala niya, mibalik siya didto ug gibuntog ang tibuok nasud. Kita n'yo? Ngano man? Nakasulod siya sa Presensiya sa Dios. Usa siya ka gibag-o na nga tawo, usa ka magbalantay.



79 Si Pedro, nga usa ka mananagat, wala’y laing hibangkaagan gawas sa pagpangisda. . . o wala’y hibangkaagan bahin sa Dios, siguro ang butang lamang nga iyang nahibaloan kaniadto mao’y kon unsaon ang pagpangisda. Apan sa dihang nakasulod siya sa Presensiya sa Dios, ug nakita ang halangdong Magbubuhat Kinsang makahimo og isda, sa diha nga gisultihan siya sa Dios nga itaktak ang mga pukot og mangandam sa pagbitad. Wala ni usa ka isda didto, human na niyang gibira ang iyang mga pukot. Apan miingon siya, “Tungod sa Imong Sulti, Ginoo. Nagatoo ako nga Ikaw mao ang Anak sa Dios, ug kung Imong tugotan. . . kung itaktak ko ang pukot, gisultihan Mo man ako nga buhaton kini; tungod sa Imong Sulti, tungod kay Ikaw ug ang Imong Pulong mao ra, itaktak ko ang pukot.” Ug sa gisugdan na niya sa pagbira, miingon siya, “Pahawa, Ginoo, usa ako ka tawong makasasala.” Kita n’yo, usa ka mananagat, human nga nahinagbo ni Pedro si Cristo dili na gayud siya ang mao ra sa gihapon kaniadto. Siya, human niadto, nagmatinud-anon na gayud sa Dios, gihatag kaniya ang mga yawi ngadto sa Gingharian. Oo, sir.

80 Si Pablo, nga usa ka nagpatawag sa kaugalingon niya ingon nga Fariseo, edukado ug binansay sa tanang relihiyon sa. . . nga anaa sa kalibutan niadtong adlaw, usa sa mga pinakailadong eskolar sa yuta kaniadto. Apan sa dihang naatubang niya kadtong Haligi nga Kalayo usa niana ka adlaw, ang Dios nga iyang ginalutos, nga wala siya nahibalo. Usa siya ka Fariseo, wala siya mitoo nga ang Dios usa ka Tawo. Nasayod siya nga ang Dios mao ang Haligi nga Kalayo, nga Kini ang sa katawhan sa Dios pagawas sa Egipto, nga nagauban Kini kanila sa sugod pa. Apan sa diha nga nakita niya kining Haligi nga Kalayo, mihapa siya. Ug nadungog niya ang usa ka Tingog nga nagaingon, “Saulo, nganong ginalutos mo Ako?”

Miingon, “Kinsa Ka man, Ginoo?”

81 Giingon Niya, “Ako mao si Jesus.” Siya kadtong tawhana, nga nag-ingon, “Sa unsa man diay kamo nabautismohan?” Gikan na siya sa Presensiya sa Dios. Usa siya ka gibag-o na nga tawo sukad niadto, dugay na siya sa Presensiya sa Dios. Ginabag-o Niini ang usa ka tawo.

82 Si Charles G. Finney, abogado, usa ka bantugang abogado nga taga-Philadelphia, apan sa dihang misulod siya sa Presensiya sa Dios giundangan niya ang iyang pag-eskwela og abogasiya ug nahimong pinakagamhanan nga magwawali nga nagkaaduna ang nasud hangtud sa karon.

[Blangko nga bahin sa teyp—Ed.] . . . usa ka magwawali, tungod kay usa niana ka adlaw nakasulod siya sa Presensiya sa Dios. Naghunahuna siya, kaniadto, nga tun-an niya ang ministerio. Kabalo na mo sa iyang libro. Nabasa ko na ang kasaysayan sa iyang kinabuhi. Migawas siya aron mag-ampo.

Naghunahuna siya nga usa kono siya ka magwawali. Aduna siya'y tinguha, nga gusto niyang magwali, ug aduna siya'y pipila ka mga wali nga gipaningkamotan niyang iwali. Milakaw siya usa niana ka adlaw, gawas sa iyang opisina, aron mag-ampo, didto sa mga kakahoyan. Miluhod siya sa luyo sa usa ka dugay nang natumba nga kahoy, nga diin iyang ginaadtoan sa kada hapon. Relihiyoso kaayo, apan wala gayud siya nagatoo Niana.

Adunay duha ka mga babaye sulod sa iglesia kaniadto, nga kanunay nilang ginasulti, "Mr. Finney, ginaampo namo nga madawat nimo ang Espiritu Santo."

Miingon siya, "Nadawat ko na ang Espiritu Santo." Ingon pa, "Usa ako ka magwawali."

<sup>83</sup> Miingon, "Mr. Finney, usa ikaw ka bantugan nga tawo, ug daghan ang imong nahibaloan sa Pulong, apan gikinahanglan mo ang Espiritu Santo. Nagaampo kami alang kanimo." Pagkabuutan nga mga babaye.

<sup>84</sup> Busa padayon lang siya, og nagpadayon. Mao nga sa matag adlaw modalikyat siya sa luyo sa iyang opisina, biyaan ang iyang agalon ug ang tanan nga ka-opisina niya, ug mogawas siya sa iyang opisina ug moadto didto aron mag-ampo. Ug usa niana ka adlaw samtang didto siya sa gawas nga nagaampo ug nadungog niya nga may nabali nga sanga. Abi niya nga ang agalon na niya kadto, nga nangita kaniya. Dalidali siyang mitindog. Nag-ampo siya niadto, "Ginoong Dios, nagatoo ako Kanimo." Ug sa kalit may nabali nga sanga, napa-igham siya hinoon, "Uhm! Uhm! Uhm!" napatindog siya ug ingon niya, mitan-aw kono siya sa palibot, git-an-aw kon unsa ang nakapabali sa sanga. Ug niadtong tungora nakasulod siya ngadto sa Presensiya sa Dios. Naamgo niya nga may katuyoan nga nabali kadto nga sanga. Mitindog siya didto, nga nagadagayday ang mga luha sa iyang mga aping. Miingon siya, "Siguro husto ang maong mga babaye. Maulaw ako nga makit-an ko sa tawo nga nagpakig-istorya sa akong Dios, apan giisip ko nga kadungganang makit-an sa tawo nga ako nagpakig-istorya sa akong agalon. Daw sa unsa ka mas labi pa ang akong Ginoo kay sa akong agalon!" Miingon, "Ginoo, pasayloa ako ug pun-a ako sa Espiritu Santo," misugod na siya sa pagsiyagit ug pagsinggit. Nakasulod siya sa Presensiya sa Dios. Dalidali siya nga midagan sa poblasyon diretso sa iyang opisina. Makusog siya nga nagasiyagit ug mitago sa luyo sa pultahan, ug miingon, "Ginoo, nagadala ako og kaulawan Kanimo. Itago ako dinhi hangtud nga mahuman kining akong gibati." Ngano man? Nakasulod siya sa Presensiya sa Dios. Usa siya ka gibag-o na nga tawo. Ang mga wali nga kanunay niyang ginawali kaniadto, mao ra gihapon ang iyang giwali ug didto na ningduol ang mga tawo sa altar. Kita n'yo, gikan man siya sa Presensiya sa Dios.

<sup>85</sup> Si Moody, nga usa ka yanong dugay na nga sapatero, halos dili siya kahibalo sa iyang ABC's. Husto kana. Salikwaut ang iyang gramatika. May nagsulti kaniya usa ka adlaw kaniadto, "Salikwaut kaayo ang imong gramatika, Mr. Moody."

Miingon siya, "Apan nakapangabig ako og mga kalag pinaagi niini." Busa . . .

<sup>86</sup> Usa ka adlaw ang mga mantalaan, ang editor sa mantalaan adunay gisulat. Giadtoan niya una didto aron makita kon giunsa sa niining tawo nga matigum ang pinanon sa mga tawo ilalum sa bisan unsa pa nga sitwasyon, niining edaran na nga lalaki, upawon, ug tanan na, ug bungoton kaayo, dakung tiyan, ug pagkamaut niya tan-awon nga tawo. Mao nga kining mantalaan nagsulat gyud og artikulo bahin kaniya, miingon, "Dili ko makita kung unsa gayud ang nakita sa mga tawo diha kang Dwight Moody." Miingon, "Maut siya, tagling ang iyang tingog, abot pa sa hawak ang bungot, mora pa og kalabasa ang pag-kaupaw niya." Ug ingon pa, "Unsa man gyud ang nakita sa niining mga tawo kang Moody?"

<sup>87</sup> Busa nakita kini sa tagdumala ni Moody, miingon, "Tan-awa, Mr. Moody, basahon ko kanimo ang nakasulat dinhi." Dili kini mabasa ni Moody nga siya lang. Busa miingon ang tagdumala, "Basahon ko sa imo ang editoryal." Ug gisulat niya kini.

<sup>88</sup> Gipakibo lang ni Moody ang iyang abaga, miingon, "Siguradong dili ako, si Cristo ang ilang gianhi." Kana lang. Ngano man? Nakasulod na siya sa Presensiya sa Dios. Gikan sa pag-ayo og mga lalalapa sa sapatos, aron sul-obon sa mga tawo; gisul-oban niya ang mga tawo sa Maayong Balita alang sa pagpangandam. Ngano man? Nakasulod na siya sa Presensiya sa Dios. Husto.

<sup>89</sup> Usa ka babaye kaniadto ang nakasulod sa Presensiya sa Dios, ingon nga siya usa ka makasasala gayud. Niadtong higayon nasayran niyang anaa siya sa Presensiya sa Dios, napasaylo ang tanan niyang sala ug nahimo siyang ingon ka kaputli ug ingon kaputi sama sa usa ka lirio. Oh, my. Mahimong pipila pa ka tawo ang mahisgotan ko dinhi, galing lang wala na'y igong oras.

<sup>90</sup> Apan gusto kong maghisgot og diyutay bahin sa akong kaugalingon mismo. Unsa pa man ang mamahimong mas ubos pa kay kanako? Asa man ako gikan kaniadto? Gikan ako sa pamilyang mga palahubog, gikan sa pamilyang mga mamumuno, gikan sa pamilyang tigpayuhot og bino. Ug kabalo na mo niana, ang matag usa kaninyo kabalo na niini, kabalo na mo kung unsa nga klase sa dungog ang aduna kami dinhi. Dili man gani makig-istorya kanamo ang mga tawo diha sa dalan. Moadto ako sa lungsod, dayon may ipangutana lang ako sa tawo, dili gani nila ako istoryahon gawas na lang kon wala na gyu'y ubang tawo. Makig-istorya sila kanako, pero kon may ubang tawong moabot, ila na akong biyaan. Ug gatindog na lang ako nga nagahilak,

“Dili, dili angay nga mamahimong ingon-niini, dili puede nga maingon-niini kini. Sayup kini.”

<sup>91</sup> Apan usa ka adlaw miduol ako sa Presensiya sa Dios. Gibag-o Niya ako ug gihimo ako nga usa na ka anak. Gidala ako sa Iyang grasya pasulod sa Iyang Presensiya. Dili ko gayud gusto nga mobiya Niini. Ania ako niini sobra sa mga traynta na ka tuig karon. Dili ko gustong biyaan Kini. Aduna na kanako ang kasiguradohan nga kanunay akong maanaa Dinha. Bisan pa gani ang kamatayon mismo dili gayud makapahimulag kanako gikan sa Iyang Presensiya. Dili gayud. Magauban ako Kaniya hangtud sa kahangturan. Sa dihang nakita ko kaniadto ang Iyang Presensiya sa unang higayon, mituaw ako nga sama ni Isaias, “Alaut ako.” Dayon gihikap Niya ako pinaagi sa Iyang grasya. Gibag-o na ako nga tawo. Ang masupilon nga kaniadto naglaroy-laroy ug kung unsa na lang ang ginabuhat ug tanan na, gibag-o na, ug sukad niadto ako nahimo na Niyang anak. Sukad niadto, gitinguha ko nang ihatag ang tibuok kong kinabuhi para sa Iyang buluhaton, unta nga mahatagan ako og napulo pa ka libo nga kinabuhi nga ihalad ngadto Kaniya. Kining ania kanako sa karon tigulang na man gud, magsingkwenta’y-tres anyos na. Ang traynta’s-tres niini, o ang traynta’y-dos ka tuig niini nagahin diha sa Maayong Balita. Aduna unta’y magahin kanako nga usa pa ka libong kinabuhi. Ngano man? Sa dihang atua ako didto sa Iyang Presensiya ug naamgo ko nga aduna diay og Usa Nga naghigugma sa mga dili angayan higugmaon, adunay Usa nga naghigugma kanako niadtong wala gyu’y naghigugma kanako, aduna’y Usa Nga nagkahingawa kanako niadtong wala gyu’y nagkahingawa kanako. Gigakus ko ang Iyang krus, ako gayud kining gigakus, ug ako ug Siya nahimong usa niadtong tungora. Ug gikan niadto gimahal ko na gayud Siya. Gipahiran Niya ang akong dughan ug ang akong kasingkasing sa Iyang Dugo, pinaagi sa paghikap kanako ug pagpasaylo sa akong mga sala, ug malipayon ako karong gabhiona nga nahimong usa sa Iyang mga pinili. Wala na gayud ako og tinguha pa nga mobiya niining Langitnong dapit, bisan pa nga anaa kanunay ang maninintal nga maninguha gayud; apan luwas na ako diha sa puluy-anan sa Dios, ug malipayon na diha sa Iyang gugma ug grasya, ug ania ako nagakinabuhi diha sa alleluiah nga bahin. My! Ginalipay gayud niini ang akong kasingkasing.

<sup>92</sup> Ginarekomendar ko Siya ngadto sa mga tawong gipangbudlayan. Sa mga tawong wala na’y paglaum ginarekomendar ko Siya kaninyo. Kaninyo nga wala pa makasulod ngadto sa Iyang Presensiya, ang bugtong butang nga kinahanglan ninyong pagabuhaton mao ang pagsugid sa inyong mga sala ug hunahunaa nga sayup kamo, ug aduna ang Dios nianang Anghel nga sinugo karong gabhiona, ang Espiritu Santo, nga magatangtang sa tanan ninyong mga sala. Dayon magatuaw kamo, “Ginoo, ania ako, paadtoa ako.” Dayon

ipataas ninyo ang inyong mga kamot ug moawit, “Pagadayegon ko Siya! Pagadayegon ko Siya! Pagadayegon ang Kordero nga gipatay tungod sa mga makakasala. Maghatag Kaniya og himaya, kamong tanan, kay ang Iyang Dugo ang naghugas sa tanang mansa.” Gihigugma ko Siya. Di’ ba kamo man usab? Magkinabuhi kita diha sa Iyang Presensiya.

<sup>93</sup> Mianhi ako dinhi sa pulpito kaganinang buntag, nga dili maayo ang pamati ug luya kaayo tungod sa . . . Didto ako—ako sa Kentucky sa miaging semana kauban ko ang pipila sa suod kong mga higala nga nagalingkod dinhi. Kung nagpabilin pa ako og dugay didto, madayonan siguro ako didto, sigurado g’yud, tungod sa ilang pagkamaayo, tungod nga usa sila sa pinakamaayong mga manlutoay nga nahibaloan ko sa tibuok kong kinabuhi. Ug sa dihang dili ko na gani makaya, sa tumang kabusog, “Igsoong Branham, dili mo ba tilawan kini?” Ug perting lamia kadto, gipaningkamotan kong kaonon gihapon. Hastang busoga kaayo nga dili na gani ako halos makalihok. Halos dili na ako—ako makatulog, ug kinahanglan kong mobangon ug maglakaw-lakaw kadali. Ug dili gayud maayo akong pamati sa pag-abot ko dinhi kaganinang buntag. Apan niadtong nakasulod na ako diha sa Iyang Presensiya, okey na. Okey na, nawala kadto tanan. Husto kana. Oh, magkinabuhi gayud diha sa Iyang Presensiya!

I will praise Him, I will praise Him,  
Praise the Lamb for sinners slain;  
Give Him glory all ye people,  
For His Blood has washed away each stain.

Iduko nato ang atong mga ulo karon.

[Ginasugdan paglaylay ni Igsoong Branham ang *I Will Praise Him*—Ed.]

For He’s done so much for me.  
He’s forgiven my transgression,  
And His Blood has washed my sin.  
I will praise Him, I will praise Him,  
Praise the Lamb for sinners slain;  
Give Him glory all ye people,  
For His Blood has washed away each stain.

[Ginasugdan paglaylay ni Igsoong Branham ang *I Will Praise Him*—Ed.]

<sup>94</sup> Karon kung ania kamo karong gabhiona . . . Ug nahibalo ako nga ania karon ang Iyang Presensiya. Nagatindog ako dinha kaganina, para sa kadtong gamay’ng batang babaye nga miyembro sa Church of God, namuhat ang Balaang Espiritu pinaagi kanako sa diha nga nag-ampo ako alang nianang batang babaye. Ang mga ginikanan niini gikan didto sa tigum sa Anderson Church of God. Ug ang tigdumala didto, nga nakaila sa maong bata, misulti kono ang mga

doktor nga “mamahimong...hapit na gyud kini mamatay, tungod sa leukemia.” Ang maong bata, buutan nga batang babaye, anaa siya sa delikado na nga kahimtang sa iyang sakit niadtong tungora. Miduol siya ug gitunol niya ang iyang gamay’ng kamot nganhi kanako, nanghubag kini, tungod sa mga dagom ug tanan na nga gipangtusok niini, ug nanglagom na. Ako siyang gitan-aw, ug nakita ko ang usa ka panan-awon. Nagabasa og libro niadto ang iyang mga ginikanan didto. Wala sila’y hingbangkaagan bahin niini. Gisulti kanila sa tigdumala niadtong tigum, nga dalhon ang maong bata dinhi. Gusto nilang mobalik para sa panerbisyo sa pagpang-ayo. Ug miingon ako, “Dad-a dinhi ang maong bata karon,” nabati ko ang usa ka paggiya.

<sup>95</sup> Sa nagatindog ako didto, gibalikan sa Balaang Espiritu ug gipakita kanako ang kasaysayan sa maong bata. Gisulti kanako kung sa unsa nga nahitabo kini, kung unsa ang ilang nabuhat. Gisulti kung unsa ang ambisyon sa maong bata, nga gusto niya nga mamahimong usa ka tigtugtog sa piano. Ug halos misinggit ang iyang inahan. Ug ang iyang amahan miingon, “Kamatuoran kana nga gikan sa Dios.” Nga nagalingkod kini didto sulod sa sakyanan ug nagapaminaw niini, dili makasulod, nagalingkod lang didto nga nagapaminaw niini niadtong tungora.

<sup>96</sup> Duna sa kalit nga migula nga usa ka dakung tabil nga landong nga nagapaibabaw sa maong bata. Ug miingon ko, “Satanas, nalupig ka na.” “Wala Ka’y pinalabi nga tawo, Dios. Ug pinaagi sa gahum sa Imong pagkabanhaw, ug ingon nga Imong alagad, akong ginahinginlan kining yawa gikan sa maong bata.” May usa dayon ka dakung masanag nga Kahayag ang mitungha ibabaw sa batang babaye, ug naayo kadto. Amen. Huh? Oo, takus gayud Siya sa tanang pagdayeg!

<sup>97</sup> Nasayod Siya sa tanang butang. Nasayod siya sa inyong kasingkasing. Ug nasayod kamo kung unsa ang inyong ginahunahuna; Siya nasayod, usab. Kon aduna man og gamay’ng sala nga nakabinbin pa diha kaninyo karong gabhiona, ug dili kamo gustong mosulod sa Presensiya sa Dios tungod nianang anaa pa diha kaninyo, mahimo n’yo ba sa makausa pa nga ipataas ang inyong kamot ug moingon, “Igsoong Branham, iampo ako, gusto ko gayud nga maanaa diha sa Iyang Presensiya sa niana nga Adlaw, nga wala’y sala.” Panalanginan kamo sa Dios. Daghan ang mga kamot, og nakita kini sa Dios. Diha sa Iyang Presensiya. Karon sultihan ko kamo kung unsa ang buhaton ninyo. Karon paminaw lang og ayo. Buhata ang sama sa gibuhat kaniadto ni David, ibutang ninyo ang Ginoo sa inyong atubangan karon mismo. Ibutang ninyo ang Ginoo tali kaninyo ug sa niana nga sala, bisan unsa pa man kanang gamay’ng nagalikos nga sala. Tingali og pagpamakak kini, tingali og pagpangawat, tingali og dautan nga panghunahuna kini, tingali’g kainit sa ulo, tingali og paghubog-hubog, tingali

og pagpanigarilyo, tingali og pagpangsugal. Wala ko kahibalo kung unsa. Tingali og pagpangibog kini. Tingali og unsa man kini. Wala ko kahibalo kung unsa kini. Bisan unsa man kini, ibutang ang Ginoo sa inyong atubangan. Ug kung ingon-ana ang inyong kasingkasing magakalipay, ug ang inyong unod magapuyo sa kasigurohan, kay kamo nasayod man nga nagsaad si Cristo nga Siya'y mangbanhaw sa kaulahiing mga adlaw. Sa diha nga Siya moabot na, mamahimo kitang sama na sa Iyang porma. Mahimo n'yo bang buhaton kini karon samtang magaampo kita.

<sup>98</sup> Langitnon namong Amahan, nahuman na ang usa ka hamubo og putol-putol nga Mensahe sa kapoy ug hago na nga alagad. Bisan pa man napamalandongan namo ang hilisgotanan mahitungod sa “ang pagpuyo diha sa Presensiya sa Dios.” Ug nakita namo karong gabhiona ang epekto niini ngadto sa balaang mga tawo nga nakasulod sa Imong Presensiya, kung unsa ang epekto niini ngadto kanila. Mga manggialamon, bantugan og gamhanang mga propeta nga mga sinugo sa Dios, ug gipadala aron iwali ang Pulong, ug bisan pa niana sa diha nga nahimamat nila Siya sa nawong og nawong ug nanghapa gayud sila sa yuta nga daw sa usa ka patay nga tawo. Unsa na lang kaha ang pagabuhaton namo sa niana nga adlaw, Ginoo? Gipamalandong na namo kini. Ginahunahuna gayud namo kini. Mga kwarenta o singkwenta nga mga kamot ang nagahunahuna na niini, Ginoo, kay sila nanagpataas man sa ilang mga kamot, o ang mga kasingkasing ilalum nianang mga kamot, nagahunahuna mahitungod sa kung unsa na lang kaha pagmahinagbo nila Siya sukad nga among nahisgotan kini. Unsa kaha ang buhaton nila kon sila magkigtabo na Kaniya?

<sup>99</sup> Ang akong mga kamot, Ginoo, nakataas. Unsa ma'y akong pagabuhaton? Karon, Amahan, aduna ko og daghang mga butang nga nabuhat ko nga kasaypanan. Gisugid ko na ang akong sala kaganinang buntag sa atubangan sa iglesia, sama sa pagsugid ko niini Kanimo didto ibabaw sa bukid sa miaging buntag bisan og nagahaguros ang hangin ug nagaulan og niyebe, ug didto ibabaw sa bukid, nga mihilak ako ug nangamuyo nga Imo akong pasayloon tungod sa akong pagkaburong. Ug daw sa nagakataha gayud ako nga maanaa sa atubangan sa akong mga kaigsoonan, nga ang pipila kanila nag-ila kanako ingon nga Imong propetang-alagad. Ug, Ginoo, daw sa dili ko gayud gusto nga motindog diha sa ilang atubangan ug sultihan sila bahin sa usa ka binurong nga nabuhat ko nga mahimo ko diay ang usa ka butang nga sama niana, apan, Dios, butang kini nga maayo para sa akong kalag nga isugid ko ang akong mga sala ug nga dili kini itago. Busa aron nga magmatinuuron Kanimo, ug bisan sa atubangan sa mga tawo, gisugid ko kini, Ginoo. Nasayup ako, nasayup gayud ako. Nagaampo ako alang sa kapasayloan.

<sup>100</sup> Ug dayon, Amahan, naglangay-langay gayud ako diha Kanimo, sa pagpangalagad Kanimo, makadaghang higayon nga taas-taas na unta ang naabot ko kung wala ko lang gibuhat kadto. Amahan, ginasugid ko ang akong mga sala. Gusto ko nga hinloan ako sa Anghel sa Dios gikan niana, pinaagi sa Dugo ni Jesus. Adunay uban pa nga mga kamot ang nagpataas karong gabhiona, ang pipila niini tingali wala pa gayud nakapangayo ug kapasayloan kaniadto; apan sigurado gayud ako sa niining usa ka butang, nga kon isugid namo ang among mga sala, pagapapason kini sa Dios, ilabay kini ngadto sa dagat sa pagkalimot ug dili na—dili na gayud kini mahinumduman pa. Ug, Amahan, sa diha nga ginasugid ko ang akong mga sala, mahitungod sa akong dili maayong mga lihok atubangan sa mga tawo, nga wala ako naggawi nga sama sa usa ka alagad ni Cristo. Wala gayud. Nahadlok ako nga basin unya masuko kanako ang mga tawo ug naghunahuna ko nga dili ko pasakitan ug ilang mga pagbati, apan wala ko hunahunaa kon unsa na ang nabuhat ko diha Kanimo, Ginoo. Ug karon ako—nagaampo ako nga Imo akong pasayloon. Ug karon, Amahan, nahibalo ko nga kung mangayo ako og pasaylo makaangkon ako og kapasayloan, ug Imo na kining gilabay ngadto sa dagat sa pagkalimot, ug dili na gayud kini Nimo mahinumduman pa. Dios, mapasalamaton gayud ako tungod niana.

<sup>101</sup> Ug nagaampo ako nga itugot Mo sa matag tawo dinhi, nga adunay sala, nagalikos nga sala nga bisan unsa man diha sa atubangan nila, hinaut nga ila kining tangtangon ug ibutang ang Ginoo sa ilang atubangan sama sa gibuhat ni David kaniadto. Kay ginasinggit namo karon, “Alaut ako, kay nakita ko ang Himaya sa Dios. Ako usa ka tawo nga mahugaw og mga ngabil, o usa ka babaye o batang babaye nga mahugaw og mga ngabil, batan-ong lalaki, o unsa man.” Bisan unsa pa man tingali kami, mahugaw kami, ug ginahangyo namo ang Dugo ni Jesus Cristo, ang gikatagana nga Halad, aron hinloan kami sa tanang kasal-anan, aron magapuyo kami sa kanunay sa Iyang Presensiya. Itugot nga manglakaw kami gikan dinhi karong gabhiona nga ang among mga kasingkasing nagakalipay, ug ang among mga unod magapuyo sa kasigurohan, nga nahibalo niini, nga pagmoabot na si Jesus, pagabanhawon kami uban Kaniya diha sa Iyang dagway, ug aron pagsugat Kaniya diha sa kahanginan, diha sa Pagsakgaw, kung ang pabalik-nga-ihap matapos na sa dili madugay. Makita namo ang ikapito nga kapanahonan sa iglesia nga naihap na, ug andam na kami sa pagbiya karon. Nagaampo kami, Dios, nga Ikaw, sa dili Mo pa pagasirhan ang pultahan, kon aduna man ugaling usa dinhi karong gabhiona nga wala pa gayud nakasulod, hinaut nga magmadali sila sa pagsulod, kay nabati namo nga ang pultahan sa kalooy, tali sa kalooy ug paghukom, ginasirhan na. Niadtong mga magadawat og kalooy magasulod sila. Kadtong ayaw mosulod magaaantos gayud sila sa paghukom. Ginasirhan



na sa Dios ang pultahan. Hinaut nga wala’y usa ka pultahan nga gisirhan karong gabhiona alang sa matag usa niining nagasugid og mga makasasala. Hinaut nga kaming tanan makaangkon gayud og kapasayloan ug kalooy. Sa Ngalan ni Jesus Cristo.

<sup>102</sup> Ug karon, Amahan, alang sa mga masakiton ug sa mga nanag-antus, alang niadtong mga nanginahanglan, nagaampo ako nga ang Imong grasya magasuplay sa tanan nilang gikinahanglan. Hinaut nga mosulod sila ngadto kang Cristo, diha sa Iyang Presensiya. Ibutang si Cristo, si Cristo, nga mao ang saad, “Ginasamaran Siya tungod sa akong mga kalapasan,’ ang akong mga sala kana. ‘Tungod sa Iyang mga labod ako naayo,’ kung ingon niana ibutang ko ang Ginoo sa atubangan sa akong balatian. ‘Ania Siya sa akong toong kamot, ug ako dili matarug,’ kung ingon niana maisogon akong magalakaw, nga nagapahayag nga naayo na ako. ‘Pinaagi sa Iyang mga labod ako naayo.’” Itugot kini, Ginoo, ngadto sa matag usa kanila. Ug nahibalo kami nga kon magasugid kami pinaagi sa among mga kasingkasing, o pinaagi sa among mga ngabil, ug magatoo sulod sa among mga kasingkasing, nan maangkon namo ang among tinguha.

<sup>103</sup> Giingon Mo, “Kung unsa man ang isulti ninyo, toohi nga mamatuman kini, maangkon mo kung unsay imong gisulti.” Nagatoo kami niana, Amahan, ug nagatoo kami nga hinloan Mo kami gikan sa tanan namong mga sala, ug ayohon ang tanan namong balatian, ug hatagi kami og grasya, Ginoo, sa pagpangalagad Kanimo.

<sup>104</sup> Ubanan Mo kining mga katawhan. Daghan kanila ang mobiyahe pa sa mangitngit nga mga kadalanan karong gabhiona. Daghan kanila ang mobiyahe pa og milya-milya. Ayaw itugot nga may mahitabo og bisan unsa man kanila, Ginoo. Halayo pa ang ilang gigikanan aron maglingkod dinhi og magapaminaw sa maong pabalik-nga-ihap, aron makita kon unsa na kami ka haduol ngadto sa katapusang panahon. Karon gihangyo ko sila nga magapanguli, nga ginapahamutang ang Dios diha sa atubangan nila, kanunay gayud diha sa atubangan nila, sa dili pa ang bisan unsa pa man nga butang. Sa dili pa sila mobiyahe, sa dili pa sila magapamuhat, sa dili pa sila—sa dili pa sila magapamangon, sa dili pa sila magahigda, sa kanunay gayud sa dili pa sila mangatulog, unsa pa man kini, unahon gayud ang Dios! “Kay ania Siya sa akong toong kamot, ug ako dili matarug.” Kon ingon-ana hinaut nga magakalipay ang ilang mga kasingkasing, ingon nga nasayod nga maangkon nila kon unsay ilang gipangayo, tungod kay gisaad na kini sa Dios, ug ang ilang unod magapuyo sa kasiguradohan. Itugot kini, Ginoo, kay amo kining ginapangamuyo sa Ngalan ni Jesus Cristo. Amen.

I will praise Him, I will praise Him,  
Praise the Lamb for sinners slain;

Give Him glory all ye people,  
For His Blood has washed away each stain.

<sup>105</sup> Karon nagatoo ba kamo nga inyo nang gibutang ang Ginoo tali kaninyo ug sa inyong kasal-anan, tali kaninyo ug sa inyong balatian, tali kaninyo ug sa inyong kasaypanan, tali kaninyo ug sa inyong mga gawi? “Ang Ginoo kanunay anaa sa atubangan ko, ug ako anaa diha sa Iyang Presensiya. Sa sunod higayon nga mosugod ako sa pagdagkot og sigarilyo, ang Ginoo anaa sa atubangan ko. Sa sunod higayon nga mosugod ako sa pagpangibog, ang Ginoo anaa sa atubangan ko. Sa sunod higayon nga mosugod ako sa pagsulti og sayup, ang Ginoo anaa sa atubangan ko. Sa sunod higayon nga mosugod ako sa pagsulti og dautan nga butang, ang Ginoo anaa sa atubangan ko. Ug dili gayud ako matarug. Amen. Magakinabuhi ako diha sa Iyang Presensiya sa matag adlaw, sa akong mga pagpakigharong, sa matag adlaw diha sa akong mga pagpanulti. Magalakaw ako ingon nga anaa ang Ginoo sa atubangan ko, tungod kay karong gabhiona gibutang ko na Siya sa atubangan ko. Ug ako dili matarug.” Nahigugma ba kamo Kaniya?

<sup>106</sup> Karon, manindog kita karon. Oh, nagbati ko og kamaayo gayud. Nagbati ko nga daw sa dili na ko gusto mopauli. Ug kabalo ba mo nga halos baynte-singko minutos na lang aron mag alas-nuybe, napasayo ako og mga halos duha ka oras. Dili ba kini makahibulong? Oh, my! Apan karon sa dihang mamauli kita, atong hinumduman, nga kinahanglan natong dalhon ang Ngalan ni Jesus uban kanato, ingon nga usa ka panagang sa matag lit-ag. Ug sa diha nga ang mga panulay mangtapok sa atong palibot. . . . nagasulay kini sa pagpahinumdom kanato nga, litoka lang diha sa pag-ampo ang maong balaan nga Ngalan.

Take the Name of Jesus with you,  
Child of sorrow and of woe;  
It will joy and comfort give you,  
Oh, take It everywhere you go.

Precious Name (precious Name), O how sweet!  
Hope of earth and joy of Heaven;  
Precious Name (precious Name), O how sweet!  
Hope of earth and joy of Heaven.

<sup>107</sup> Pila ba ang nangalipay sa atong pastor, nga si Igsoong Neville? [Nagaingon ang kongregasyon, “Amen.”—Ed.] Dili ba kamo mapasalamaton sa Ginoo tungod sa usa ka maayo, matinuuron, nga sa adlaw-adlaw, nagatoo gayud sa Maayong Balita? [“Amen.”] Ug maanindot kaayo ang pagbuhat niya sa buluhaton pinaagi sa pagtuman sa mga Sugo sa Dios, ug ginawali ang Pulong ug ginapadayon kining maayo kaayo nga espirituhanong kahimtang dinhi sa iglesia sa tanang panahon. Hinumdumi, nakaadto na ako sa East Coast, mitabok didto sa Habagatan, ug ngadto sa West Coast, ug hangtud sa Canada,

ug wala pa ako nakahinagbo og usa ka iglesia nga ingon ka espirituhanon sama niini nga iglesia dinhi. Nagkalahi na gayud ang uban, oo, nagpaingon na sila sa pagkapanatisismo, o sa kung asa na lang sila nahisalaag, o nangabugnaw na og ayo nga dili na sila mauyog. Kana lang.

<sup>108</sup> Karon, nahigugma ba kamo sa usa'g usa? [Nagaingon ang kongregasyon, "Amen."—Ed.] Oh, makiglamano sa usa'g usa, ug moingon, "Dalaygon ang Ginoo."

<sup>109</sup> [Nagapakiglamano si Igsoong Branham sa mga tawo—Ed.] Dalaygon ang Ginoo. Dalaygon ang Ginoo. Dalaygon ang Ginoo. Dalaygon ang Ginoo, igsoong babaye. Dalaygon ang Ginoo. Nalipay ako nga ania ka, igsoon. Dalaygon ang Ginoo, igsoong babaye. Panalanginan ka sa Dios. Bueno. Panalanginan ka sa Dios. Sige. Panalanginan ka sa Dios. Nasayod ako kung unsay imong gikinahanglan. Panalanginan ka sa Dios. Panalanginan ka sa Dios.

Take the Name of Jesus with you,  
As a shield from every snare;  
When temptations round you gather, (Unsa  
ma'y buhaton ninyo?)  
Breathe that holy Name in prayer.  
Precious Name (precious Name), O how sweet!  
(O how sweet!)  
Hope of earth and joy of Heaven.  
Precious Name (precious Name), O how sweet!  
Hope of earth and joy of Heaven.

<sup>110</sup> Iduko nato ang atong mga ulo karon. Sa hinay gayud nga paagi, dili nato hikalimtan kana karon. Kantahon nato kana nga garay pag-usab.

Take the Name of Jesus with you, (Para sa  
unsa?)  
For a shield from every snare, (sa dihang  
mosulay si Satanas sa paglit-ag kanimo);  
When temptations round you gather, (Unsa  
ma'y buhaton ninyo?)  
Just breathe that holy Name.

"Kay ang Ginoo anaa man sa atubangan ko; ako dili matarug!"

Precious Name (precious Name), O how sweet!  
Igsoong Neville.



*SA IYANG PRESENSIYA* CEB62-0909E  
(In His Presence)

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Septyembre 9, 1962, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2017 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)